



Stručna služba općinskog vijeća i općinskog načelnika

Broj: 01/1-02-800/19

PRIJEDLOG

Ilijaš, 18.04.2019. godine

Z A P I S N I K

sa 30. (tridesete) sjednice Općinskog vijeća Ilijaš, održane dana 18.04.2019. godine, sa početkom u 10:00h.

Tridesetom sjednicom Općinskog vijeća Ilijaš predsjedavala je predsjedavajuća Općinskog vijeća Ilijaš g-đa Alma Omerović.

Prisutni vijećnici:

RB.	IME I PREZIME
	SDA
1	ŠEHERZADA ĆOSIĆ
2	ANEL BUMBULOVIĆ
3	VEHID HALILOVIĆ
4	ALMA OMEROVIĆ
5	MEHMED SINANOVIĆ
6	ADEM ALIĆ
7	FAHIR HASANOVIĆ
8	MIRZA BEKTIĆ
9	SEMIR DEDIĆ
10	HALID DIZDAREVIĆ
11	RASIM ŠEHIĆ
12	MELISA MATORUGA
13	ALEN HASKOVIĆ
14	SEAD ŠEHIĆ
	SDP
15	ALAN ŠERAK
16	ELDAR ŠEHIĆ
17	MIRSAD OSMANOVIĆ
	SBB-FAHRUDIN RADONČIĆ
18	-
	BPS-SEFER HALILOVIĆ
19	MUHAMED HANDŽIĆ
20	ALMIR ŠPIODIĆ
	GS
21	-
22	ASIM MUJIĆ
	SAMOSTALNI VIJEĆNICI
23	SEMIR DIZDAREVIĆ
24	BESIM GLJIVA
	LDS
25	MEHO DŽINDO

Odsutni vijećnici:

1. Akif Bešlija i
2. Edhem Hasanović

Prisutni gosti:

1. TV Vogošća
2. Radio Ilijaš – Aida Kevrić-Muratović
3. Mehmed Smajlović – predsjednik savjeta MZ Mrakovo
4. Mirsad Hamzić – predsjednik Savjeta MZ Malešići
5. Alen Matoruga – predsjednik Savjeta MZ Misoča
6. Meho Tabaković – predsjednik Savjeta MZ Ljubina
7. Senad Kovačević – predsjednik Savjeta MZ Srednje
8. Safet Gabeljić – predsjednik Savjeta MZ Podlugovi
9. Fuad Dervišević – član Savjeta MZ Ilijaš Grad
10. Irfan Nefić – komandir PS Ilijaš
11. Amra Matoruga – direktorica OJ DZ Ilijaš
12. Belma Hajdarević – predstavnik specijalističko-konsultativne djelatosti DZ Kantona Sarajevo
13. Elvira Lokmić – predstavnik specijalističko-konsultativne djelatosti DZ Kantona Sarajevo
14. Senada Čizmić – rukovodilac službe računovodstva i finansija JKP "Vodostan" d.o.o. Ilijaš
15. Midhat Čeho – koordinatir za poslove mjesnih zajednica
16. Meho Gijiva – Služba za društvene djelatnosti i poslove mjesnih zajednica
17. Nizama Mališević – šef katastra
18. Volonteri: Nedim Balta i Ehlimana Fazlić

Ostali prisutni:

1. Akif Fazlić – općinski načelnik
2. Sadeta Brkić – pomoćnik načelnika
3. Nijaz Spahić – pomoćnik načelnika
4. Zdravko Barić – pomoćnik načelnika
5. Aziz Fazlić – pomoćnik načelnika ?
6. Merima Osmanović – pomoćnik načelnika
7. Meliha Avdibegović – pomoćnik načelnika
8. Ilda Kahriman – sekretar OV-a Ilijaš
9. Nermina Lemezan - stručni saradnik za informisanje
10. Adha Masnopita – stručni savjetnik za stambeno-komunalne poslove
11. Enisa Mešetović – stručni suradnik sa obrazovanje i pitanja mladih i NVO sektor
12. Đenan Suša – IT administrator
13. Maida Habibović – zapisničar.

ALMA OMEROVIĆ – predsjedavajuća

Otvorila je sjednicu i konstatovala da je trenutno prisutan 21 vijećnik, te da postoji kvorum za odlučivanje.

Zatim je dala na razmatranje zapisnik sa 29. sjednice OV-a.

Primjedbi na zapisnik nije bilo, pa je OV-e jednoglasno usvojilo zapisnik sa 29. sjednice OV-a.

Pročitala je predloženi dnevni red i dala na razmatranje.

MUHAMED HANDŽIĆ – vijećnik BPS-Sefer Halilović

Predlažem da se sa dnevnog reda povuče tačka 5. , 7. i 8.

Obrazloženje: tačka 5. - razlog je što direktorica nije tu i nisam siguran da ćemo moći dobiti sve adekvatne odgovore od onog ko danas mijenja direktoricu, a znamo da direktorica iz zdravstvenih razloga nije prisutna na sjednici. S tim u vezi, predlažem da ova tačka povuče sa dnevnog reda.

Tačka 7. i 8. - one zadiru u tri Zakona koje jasno krše i jedan Statut. Radi se o sljedećem: krši Zakon o principima lokalne samouprave Federacije BiH, krši Zakon o ljudskim pravima i krši Izborni zakon. Dalje, krši Statut općine Ilijaš član 86. i 88. Ukoliko bi donijeli Odluku pod tačkom 7. i 8. samim tim bi mi vijećnici prekršili Statut općine Ilijaš što nam naravno nije u interesu nikome.

S tim u vezi, predlažem da se ove tačke povuku sa dnevnog reda.

ALEN HASKOVIĆ – zamjenik predsjedavajućeg

Kolegij OV-a je prilikom utvrđivanja dnevnog reda napravio jedan propust smislu redoslijeda tačaka dnevnog reda, te stoga predlažem da tačka 8. Prijedlog Odluke o izmjenama i dopunama Odluke o osnivanju mjesnih zajednica na području općine Ilijaš bude tačka 7., a tačka 7. Prijedlog Odluke o uslovima, načinu kandidiranja, održavanju izbora, dodjeli mandata u mjesnim zajednicama i razrješenju predsjednika i članova Savjeta mjesnih zajednica postane tačka 8.

MUHAMED HANDŽIĆ – vijećnik BPS-Sefer Halilović (replika)

To bi se u našem narodnom jeziku reklo "nije šija nego vrat". Dakle, ja sam bio jasan. Ovdje se krše Zakoni, kršimo Statut. Ja ne želim uopšte raspravljati o ovim tačkama dok ne dođu na red Odluke koje ne krše niti jedan od ovih Zakona, a posebno Statut općine Ilijaš po kojem mi radimo. Ovo je jasno kao dan. Ako vama nije jasno o čemu ja govorim, pročitat ću član 86. i 88. Statuta općine Ilijaš.

ALAN ŠERAK – vijećnik SDP-a

Ukoliko Odluka nije pravno usklađena, a Komisija za statut i propise je rekla da jeste, ali generalno u zadnje vrijeme ja sumnjam u kredibilitet ove Komisije koja se sve više ponaša politički, a ne stručno kao što bi trebalo da bude, zamolit ću predlagača da se očituje po ovom pitanju što je kolega Handžić tražio. Ukoliko, uistinu, ova Odluka nije usklađena sa ovim aktima koje je napominjao, da li da je danas povučemo ili možda da ide kao nacrt i da to sve uskladimo kroz nacrt i da iduće sjednice Općinskog vijeća dobijemo prijedlog i isti usvojimo.

AKIF FAZLIĆ – općinski načelnik

Kada su u pitanju prijedlozi koji su došli od strane vijećnika vezano za dnevni red, predlagač ostaje pri prijedlogu tačaka za ovu sjednicu Općinskog vijeća, s tim što prihvatamo prijedlog da se tačka 7. i 8. zamjene, jer imaju svoju sinhronizaciju. Komisija za statut i propise, o njoj možete pričati koliko je meritorna ili nije, za ovu sjednicu je potvrdila statutarnost i zakonitost tih Odluka. Kroz raspravu se može utvrditi i dokazati je li to tako ili

nije, ali mislim da nema razloga da tačke povlačimo sa dnevnog reda i ja, kao predlagač, ostajem pri svim ovim tačkama. Pogotovo ostajem pri tački koja je vezana za Izvještaj naše JKP "Vodostan" d.o.o. Ilijaš. Mi ovdje imamo predstavnike JKP "Vodostan" d.o.o. Ilijaš kada je u pitanju uprava, imamo predsjednika Skupštine ovog preduzeća i nemojmo da sada hipotetički pričamo ne daj Bože da sada direktorica bude pola godine bolesna, pa onda nećemo pola godine razmatrati Izvještaj. Zaista to nisu ti razlozi i mislim da ljudi koji su tu da mogu meritorno prezentirati Izvještaj, a ono što je najvažnije za vas, dobili ste kompletan Izvještaj u pisanom smislu i kada je u pitanju Izvještaj uprave i kada je u pitanju Izvještaj Nadzornog odbora, kada je u pitanju Izvještaj Skupštine, Izvještaj Neovisnog revizora, tako da možete danas meritorno davati ocjenu rada našeg javnog preduzeća za prošlu godinu.

ALAN ŠERAK – vijećnik SDP-a (replika)

Želim replicirati dobronamjerno. Ukoliko usvojimo današnji dnevni red, a u nazivu same tačke ostane Prijedlog, kasnije ga nećemo moći mijenjati u Nacrt. Predlažem, ukoliko je tačno ovo što je kolega Handžić rekao, da Odluku stavimo u Nacrt i kroz Nacrt da popravimo sve ove stvari tj. odredbe koje nisu usklađene sa Statutom općine Ilijaš i drugim zakonskim propisima koje je kolega navodio i da za iduću sjednicu Općinskog vijeća dođemo sa prijedlogom. Po meni je to bolje rješenje i nećemo nigdje zakasniti. Evo vi se opet očitujte kako god želite.

MUHAMED HANDŽIĆ – vijećnik BPS-Sefer Halilović (replika)

Ja ovdje ne iznosim neistine. Da sam iznosio neistine vi bi me presreli vjerovatno u nekim od prethodnih sjednica, ali evo ako hoćete u članu 86. piše da se za predsjednika Savjeta mjesne zajednice i Savjete mjesnih zajednica biraju kandidati koji dobiju najveći broj glasova. U Odluci u tom slučaju to nije tako, nego tim koji dobije najveći broj glasova i iz tog tima je predsjednik Savjeta mjesne zajednice lice koje je prvo na redu tog tima. Dakle, onaj ko je peti, četvrti ili treći može dobiti i duplo više glasova od prvog, ali taj prvi je predsjednik Savjeta mjesne zajednice. Time mi namećemo građanima svoju volju, a ne volju građana koji biraju predsjednike Savjeta mjesnih zajednica. Dalje, u potpunosti ste ispolitizirali ovu Odluku i doveli je na nivo izbora Općinskog vijeća ili većih nivoa vlasti. I još što je najcrnje, upuštamo se u to da oduzimamo ljudima elementarna ljudska prava, a to je da ne dozvoljavate da budu birani i izabrani. Mi vijećnici, odnosno većina nas smo bili kandidati na prošlim Općim izborima za veće nivoe vlasti. Neki su prošli, a neki nisu. Niko nam nije osporio da budemo kandidati. Niko nam nije osporio ni da budemo izabrani. Ovom Odlukom vi osporavate nekom od vijećnika, nekom od predstavnika Skupštine Federacije ili već čega, da budu birani na nivou mjesnih zajednica. Odakle vam to pravo i na osnovu kojeg zakona i čime ste se rukovodili da donesete takvu Odluku? O takvoj Odluci ja ne želim ni raspravljati, a i ne želim da glasam za nju i da je donosim.

ALMIR ŠPIODIĆ – vijećnik BPS-Sefer Halilović

U potpunosti se slažem sa kolegom Handžićem da se ova Odluka povuče sa dnevnog reda, a osim toga što zadire u zakone, ova Odluka je i dosta nepotpuna. Ima dosta anomalija koje nisu definisane i koje su ostale nedorečene. Prije ovog saziva Vijeća se donosila Odluka za mjesne zajednice pa ste napravili određene propuste koji su apsurd. I ovom Odlukom ih niste ponovo obuhvatili. Naveli ste ovdje ko ne može biti član Savjeta mjesne zajednice što znači, ako nije definisano Odlukom, svi ostali mogu biti. Htio sam da

pitam na osnovu kojih indikatora ste došli do zaključka da je nespojiva funkcija vijećnika sa funkcijom predsjednika i člana Savjeta mjesne zajednice i u kojem Zakonu ste našli uporište za ovakvu Odluku? Molim vas, citirajte mi Zakon u kojem imate uporište da vijećnik ne može biti kandidat za neku drugu funkciju za koju ga biraju građani. U ovom slučaju, za funkciju predsjednika ili člana Savjeta mjesne zajednice, dok ne podnese ostavku na poziciju vijećnika. Molim predlagača da mi citira taj Zakon gdje ste našli uporište za ovu Odluku.

Takođe i ja predlažem da se ove dvije tačke (7. i 8.) povuku sa dnevnog reda.

ALEN HASKOVIĆ – zamjenik predsjedavajućeg (replika)

Zamolio bih kolege da se ne upuštamo u raspravu po ovoj tački dnevnog reda. Mislim da ste naveli dovoljno razloga zašto mislite da je treba povući sa dnevnog reda. Predlagač je ostao pri tome da te tačke ostanu na dnevnom redu, Komisija za statut i propise je dala svoje mišljenje, te ne vidim ništa sporno da tačka ostane na dnevnom redu, da je danas razmatramo i uzmemo učešće u raspravi kada za to dođe vrijeme.

ALAN ŠERAK – vijećnik SDP-a (replika)

Ja ipak apelujem da opet predlagač razmisli i da ovo ide u formi nacрта, pogotovo iz razloga jer ovdje nemamo mišljenje nadležne Komisije koja se bavi radom mjesnih zajednica. Mislim da je itekako važno da je ova Komisija trebala dati svoj komentar i mišljenje na prijedlog ove Odluke, a koliko vidim ista nije ni bila uključena u samu izradu ove Odluke koju mi imamo na stolu. Tako da je možda najbolje rješenje da, jer nećemo nigdje zakasnuti, ovo prolongiramo za mjesec dana i da ide u formi nacрта i da se i Komisija koju smo mi birali kao stručno tijelo, uključi i da svoje prijedloge i komentare na ovaj prijedlog Odluke. Također i političke partije, građani i svi ostali da daju svoje mišljenje i onda u konačnici za mjesec dana dođemo sa prijedlogom najboljeg mogućeg rješenja kako ovu oblast urediti i kako i na koji način ubuduće birati predsjednike i članove savjeta mjesnih zajednica.

RASIM ŠEHIĆ – vijećnik SDA

Ne ulazeći u primjedbe i prijedloge kolega, želio bih samo jednu stvar spomenuti, a to je kada smo donijeli Odluku da prolongiramo izbore u mjesnim zajednicama koji su se trebali održati 2018. godine, ako se sjećam dobro mislim da smo prvi put imali ovu situaciju, tada smo predlagača obavezali vremenskim rokom. Mislim da je bilo ili godina dana ili najkasnije do maja. U tom kontekstu, postavljam sam pitanje ovdje i sebi i kolegama imamo li mi uopšte prostora i vremena? Možda da je ova tačka na prethodnoj sjednici bila u formi nacрта i možda bi tada bila meritorna da se tada razmatra, ali mislim da smo mi sada sami sebe doveli u cajtnot s vremenom da ovaj Prijedlog Odluke usvojimo ovakvu kakva jeste sa amandmanima koji mogu uvijek da se predlože i dostave.

ALAN ŠERAK – vijećnik SDP-a (replika)

Mi ovdje jedino što možemo derogirati je jedino da derogiramo Zaključak koji smo donijeli, a mi smo ti koji autentično to možemo uraditi tj. ono što mi donesemo možemo staviti van snage. Bojim se da smo mi prošle godine prekršili Statut općine Ilijaš gdje jasno piše da mandat predsjednicima i Savjetima mjesnih zajednica traje četiri godine. Ne znam tačno kojim članom je to definisano. Hajde, "zažmirili" smo pred tom činjenicom želeći naći neko

najbolje rješenje. Mislim da evo i sada ovdje ne kršimo ništa, izuzev što stavljamo taj Zaključak van snage, a Zaključak je bio da se u aprilu ove godine moraju održati izbori. Do 01.aprila mi smo to morali već provesti.

Vidim da smo ovlastili Općinsku izbornu komisiju za ovo i bojim se da opet nećemo stići do maja da to uradimo obzirom da je danas 18.april. Možda da ipak uključimo širu javnost, sve zainteresovane strane i svi zajedno uzmemo učešće u izradi ovog Prijedloga Odluke. Da bi to uradili, danas ova Odluka treba da ide kao Nacrt. Mislim da je, po meni, to najbolje rješenje. Neka se predlagač još jednom izjasni.

MUHAMED HANDŽIĆ – vijećnik BPS-Sefer Halilović

Povodom priče kolege Šehića da samo došli u cajtnot s vremenom, ja ne bih da dolazim u probleme sa Zakonom, a ovim će doći. Ako je danas na dnevnom redu ova Odluka, onda je prije trebala biti tačka Izmjene Statuta općine Ilijaš. Znači, prije ove tačke dnevnog reda, trabali smo imati tačku Izmjene Statuta općine Ilijaš. Neću da rušim i ne trebate da rušite kolege vijećnici Statut općine Ilijaš tj. dokument po kojem mi radimo. On je stariji od jedne Odluke. Zakon je stariji od jedne Odluke i to morate znati. Prema tome, bez obzira koliko mi bili u redukciji s vremenom, ne želim da raspravljam o Odluci koja krši Statut.

BESIM GLJIVA – samostalni vijećnik

Što se tiče tačaka dnevnog reda, ja sam najbliži razmišljanju kolege Šeraka, a takođe i djelimično kolege Handžića. Izbori u mjesnim zajednicama, ako uzmemo u obzir prethodna dešavanja prilikom izbora u mjesnim zajednicama, sve ono što se dešavalo, sve turbulencije koje dolaze prilikom samih izbora, mislim da je trebalo, a i imali smo dovoljno vremena da opreznije priđemo ovom pitanju. Znači, da to ide u formi Nacrta, da malo više ljudi uzme učešća i da svoje prijedloge i da na najkvalitetniji način izvršimo, odnosno donesemo pravila vezane za izbore u mjesnim zajednicama. Sada neću pričati o Odluci, a ako bude na dnevnom redu, onda ću uzeti učešće u raspravi. Međutim, ponavljam da bi najzdravije bilo i ništa nam mjesec dana ne znači, da Odluka ide u formi Nacrta da ove stvari za koje smatram da ima manjkavosti se dorade. Ovdje nije niko prisutan iz Komisije za statut i propise da nam ovo obrazloži. Ovdje niko ne obrazlaže i ne nudi neki drugi argumenat da je ovo OK. To je jedna stvar. Druga stvar, činjenica je da se kod nas mnoge stvari rade u uskim krugovima i kanlišu se na način kako "uskim" odgovaraju. Međutim, evo nije ni to bitno, ali radi same transparentnosti i što boljeg i kvalitetnijeg načina, a poslije rata su nam uvijek nekako bili "nakaradni" ovi izbori u mjesnim zajednicama. Ja sam dugo u ovom Vijeću, nekih sedamnaest godina, tako da pamtim mnoge izbore i mislim da nam ništa ne znači ako bi ovu Odluku pretvorili u Nacrt kako bi do naredne sjednice našli najkvalitetnije rješenje.

SEMIR DIZDAREVIĆ – samostalni vijećnik

Ovo je ona stara "znamo da nije po Zakonu, ali nama se žuri". Ja mislim da treba staviti Zakon prije svega zbog više stvari. Prvo, ovdje smo napravili zatvorene liste koje, znamo šta je CIK napravio, da prvo idu podobni i poslušni broj jedan, a onaj npr. pod brojem 10. što će imati puno više glasova da prosto kao "konj" povuče listu da lista dobije glasove, a onaj ko najbolje sluša će nam biti predsjednik. To nije, u najmanju ruku, korektno. Drugo, kada je u pitanju ovaj navodni sukob interesa odmah da se zna, ne planiram se više za bilo šta u životu kandidovati, a posebno ne za opštinsko vijeće i mjesne zajednice. Mi ovdje imamo kolega vijećnika koji su u većem sukobu interesa nego što je sukob

interesa Vijeće i mjesna zajednica. Ja ne vidim da tu ima tolike povezanosti da to mora biti toliko eliminatorno. Možda upravo ovo što su prethodnici rekli da ovo ide u Nacrt, a ako ne, onda da se povuče sa dnevnog reda, pa da se onda fino uradi i provede onako kako treba.

ALMA OMEROVIĆ – predsjedavajuća

Predlagač se izjasnio da ostaje pri stavu da predložene tačke ostaju na dnevnom redu, te stoga predlažem dnevni red koji sam pročitala uz izmjene da tačka 7. postaje 8., a tačka 8. postaje tačka 7.

Dnevni red dajem na glasanje.

ALAN ŠERAK – vijećnik SDP-a

Zamjena pozicija je bila, koliko se sjećam, predložena od strane Alena Haskovića i Zaključkom smo se trebali izjasniti hoćemo li zamjeniti redoslijed tih tačaka.

ALEN HASKOVIĆ – zamjenik predsjedavajućeg (replika)

Prilikom izlaganja predlagača, predlagač je takođe istu stvar rekao da ima smisla zamjeniti tačku 7. i 8. što znači usput da je to i prijedlog predlagača.

ALAN ŠERAK – vijećnik SDP-a (replika)

Predlagač je rekao da se slaže sa tim prijedlogom, ali u konačnici mi smo ti koji usvajamo dnevni red i mi svojim glasanjem potvrđujemo isti. Dakle, morali smo se izjasniti o predloženom dnevnom redu, bilo da se radi o predlagaču ili o nekom prijedlogu od strane vijećnika.

ALMA OMEROVIĆ – predsjedavajuća

S obzirom da smo glasali za dnevni red, imamo potrebnu većinu da radimo po današnjem dnevnom redu.

ALAN ŠERAK – vijećnik SDP-a

Ja ću vas zamoliti predsjedavajuća, ako mislite da vodite ovu sjednicu, onda je vodite po proceduri kako treba. Dakle, ja sam reagovao kada ste to stavili na glasanje i vi ste trebali sami sebe korigovati i reći: "Uredu, kolega Šerak ima određenu primjedbu, mijenja se tačka ova, stavlja se na glasanje, mi istu izglasamo". Kada to izglasamo, stavljamo upotpunosti dnevni red na glasanje. Ukoliko dnevni red nije prošao, a neko mi je evo sada sugerisao da dnevni red nije dobio potrebnu većinu. Tako da vama predlažem da današnju sjednicu vodite kako treba.

RASIM ŠEHIĆ – vijećnik SDA (poslovnička intervencija)

Obzirom da je predsjedavajuća dala tačku na glasanje i da je samim tim bila završena diskusija po pitanju dnevnog reda, ja izražavam sumnju u glasanje i tražim pojedinačno glasanje.

Tražim pauzu od pet minuta i nakon toga pojedinačno glasanje.

Uslijedila je pauza od 10:45-10:50h.

Nakon pauze, predsjedavajuća predlaže dnevni red kako je ranije pročitala uz izmjene da tačke 7. i 8. zamjene redoslijed, tj. tačka 7. će biti tačka 8., a tačka 8. će biti tačka 7. i da se vijećnici pojedinačno izjasne.

ALAN ŠERAK – vijećnik SDP-a (poslovnička intervencija)

Ne možemo sada primjeniti pojedinačno izjašnjavanje, jer vi sada treba da date na glasanje prijedlog za izmjenu dnevnog reda, a onda ako usvojimo takav prijedlog da se mijenja dnevni red, u konačnici onda stavljamo dnevni red na glasanje. Dakle, vi ćete sada reći: "Imamo prijedlog predlagača, vijećnika, ko je već predložio, da se mijenja ta i ta tačka, jeste li za". Mi izglasamo ZA, a onda se stavlja na glasanje dnevni red sa izmjenjenim tačkama. To je procedura.

ELDAR ŠEHIĆ – vijećnik SDP-a (poslovnička intervencija)

Da li će sada vijećnik Anel Bumbulović glasati, obzirom da na prethodnom glasanju nije bio prisutan?

ALMA OMEROVIĆ – predsjedavajuća

Hoće glasati, zato što ste vi nastavili raspravljati o ovoj tački dnevnog reda.

ELDAR ŠEHIĆ – vijećnik SDP-a (poslovnička intervencija)

Nismo mi nastavili raspravljati, nego ste vi stavili dnevni red na glasanje, a on je došao nakon toga i nije upućen, a mi raspravljamo sat vremena o jednoj tački, a on će sada samo glasati. Znači, ima li pravo sada glasati?

ALMA OMEROVIĆ – predsjedavajuća

Ima pravo glasati.

RASIM ŠEHIĆ – vijećnik SDA (poslovnička intervencija)

Predsjedavajuća, ponovo bih vas pozvao da se vratite na ono što sam predložio, a to je sumnja u glasanje. Nakon zaključene rasprave možemo samo da glasamo, nemamo mogućnost diskusije.

ALAN ŠERAK – vijećnik SDP-a (poslovnička intervencija)

Poslovnička intervencija se odnosi na pitanje, a i ujedno tražim dodatno obrazloženje, jer smo sada svi zbunjeni. Za šta glasamo i za koji dnevni red? Sa kojim tačkama dnevnog reda? Koji je redoslijed tačaka za koji ćemo sada glasati? Ja sada stvarno više ništa ne znam. Hoćete da se pojedinačno izjašnjavamo? Onda ovaj prijedlog koji ste vi sada rekli, sa izmjenjenim tačkama, ne prolazi, nego ostaje onako kako jeste. Ako ćemo se sada pojedinačno izjašnjavati na osnovu dnevnog reda koji je maločas predložen, onda vam ostaje sve ovo isto. Ne mijenjamo ništa.

ALEH HASKOVIĆ – zamjenik predsjedavajućeg (replika)

Kolegica je prilikom davanja na glasanje dnevnog reda prije pauze rekla da se mijenja redosljed tačaka 7. i 8. Ako ima potrebe, ja ću je zamoliti da ponovo pročita dnevni red sa tim prijedlogom da se tačke 7. i 8. zamjene, jer je predlagač to prihvatio i saglasan je da to bude tako. Za takav dnevni red treba da se pojedinačno izjasnimo, jer je izražena sumnja u glasanje od strane predsjednika Kluba SDA.

ALAN ŠERAK – vijećnik SDP-a (replika)

Ovo što vi nama sada predlažete, ja uistinu nisam čuo predsjedavajuću da, koja se očito zbunila, kaže stavljam na izjašnjavanje dnevni red sa izmjenjenim tačkama dnevnog reda. Ja to nisam čuo i tako nije ni bilo, mislim. U konačnici, ako neko daje nekakav prijedlog, mi se o istom izjašnjavamo Zaključkom. Dakle, mi smo se morali izjasniti hoćemo li izmjenjeni dnevni red prihvatiti ili nećemo. Vi ste stavili na glasanje dnevni red koji je dobio epilog kakav je dobio. Sada ste doveli dodatnog vijećnika i ovo je stvarno sramota. Ovo se u Ilijašu nikada nije desilo, a ovo vam je isključivo iz jednog jedinog razloga zato što ne uvažavate ovu drugu stranu koja je bila i više nego konstruktivna kada je u pitanju ovaj prijedlog. Dakle, nismo mi ovo uzeli sada ovdje da namjerno nešto kao obaramo. Svi ćemo mi glasati za ovo. Međutim, trebali smo primijeniti malo i volju i druge strane koja je očito pametnija od vas, pa to staviti u Nacrt da se malo više ljudi izjasni o istom. Ali ne. Vi ste nama ovdje došli sa gotovim prijedlogom Odluke i mi to trebamo danas izglasati. Nismo konsultovali nadležnu Komisiju koju smo mi obrazovali, izglasali i formirali da se bavi ovim pitanjem. To nismo uradili, a to joj je u nadležnosti. Komisija treba da predstavlja stručno tijelo koje će nama davati smjernice po pitanju svih mogućih akata koji dolaze na dnevni red OV-a. Mi to nismo uradili. Opet kažem, ukoliko se usvoji ovakav dnevni red kakav jeste, nema kasnije mijenjati iz prijedloga u nacrt i obratno.

ALEN HASKOVIĆ – zamjenik predsjedavajućeg

Koliko se sjećam imali smo raspravu po dnevnom redu. Predsjedavajuća je zaključila bilo kakvu diskusiju. Prijedlog dnevnog reda je dat na glasanje, tražena je pauza od pet minuta i izražena je sumnja u glasanje. Ne vidim razlog da se ponovo upuštamo u raspravu o dnevnom redu, nego da nastavimo sa sjednicom i izjasnimo se za dnevni red, a ako postoji potreba, neka predsjedavajuća pročita ponovo tačke dnevnog reda.

SEMIR DIZDAREVIĆ – samostalni vijećnik

Predsjednik KV SDA je izrazio sumnju u glasanje na osnovu onoga što je bilo na ekranu. Dakle, ako vi nemate, mi imamo uslikano kako je bilo na ekranu, pa nek se izjašnjavaju oni koji su u tom trenutku glasali i kako je bilo na ekranu. Znači, on je izrazio sumnju na ono što je bilo na ekranu i kako smo mi glasali, a ne sada da se izražava sumnja kada smo se sabrali. Sumnja je bila na ono što je na ekranu. Vratimo se na ekran kako je bilo, pa ko je tada glasao, neka sada usmeno kaže kako je glasao.

MUHAMED HANDŽIĆ – vijećnik BPS-Sefer Halilović (replika)

Često mi bude neprijatno da vodim ovakve diskusije kada su nam gosti prisutni, ali je ovo danas izuzetno pozitivno što su ovi gosti ovdje da vide kakav cirkus vlada u ovom Vijeću. Ovo je pravi cirkus. Vi ste smiješni. Na kraju krajeva vi se megalomani i tako se ponašate

drsko i pokazujete svoju drskost na jedan ovakav način. Prekidate sjednicu, prekidate glasanje, tražite pet minuta pauze da dobijete na "mišiće" to što tražite i tražite da kršite Zakone, što radite naravno i što će vam se "obiti o glavu". Ja vam tvrdim da će vam se "obiti o glavu". Dalje, kada donosimo ovakve Odluke, a ti predsjedavajuća pričaj sa dopredsjedavajućim, nemoj ti mene ni slušati, jer to i ne radiš nikada. Ne slušate me, neću pričati dok vi držite glavu ispod stolova i pričate.

ALMA OMEROVIĆ – predsjedavajuća

Kolega ponašajte se kako treba.

MUHAMED HANDŽIĆ – vijećnik BPS-Sefer Halilović

Poštujte vi mene, pa ću ja vas poštovati. Nikada vas neću poštovati, dok vi mene ne počnete poštovati. Da li vas je stid kako se ponašate? Sašaptavate se dok vijećnik priča i komentariše vašu zloupotrebu položaja.

Molim vas, za svaku ovakvu Odluku treba ovdje bude prisutan predsjednik Komisije za statut i propise kako bi nam dao odgovore, jer ovdje se radi o njemu. Što nam "potura" dokumenat koji nije zakonit. Donosite nam nešto ovdje da mi kršimo Zakon i da me "sutra" neko vodi odavde. Ja to neću.

ALMA OMEROVIĆ – predsjedavajuća

Kolega Hasković.

ELDAR ŠEHIĆ – vijećnik SDP-a (krivi navod)

Krivi navod za vijećnika Alana Šeraka.

ALAN ŠERAK – vijećnik SDP-a

Kolega Šehiću moram te prekinuti, jer kolega Hasković ima prednost.

ALMA OMEROVIĆ – predsjedavajuća

Da li vi kolega Šerak vodite sjednicu ili ja?

ALAN ŠERAK – vijećnik SDP-a (poslovnička intervencija)

Kolega Hasković ima poslovničku intervenciju, a Eldar Šehić krivi navod. Prednost ima kolega Hasković. Naučite se kako funkcionišu stvari i kako se vodi sjednica Općinskog vijeća. Kada neko traži poslovničku intervenciju dajete mu riječ.

ALMA OMEROVIĆ – predsjedavajuća

Hvala na sugestiji.

ALEN HASKOVIĆ – zamjenik predsjedavajućeg (poslovnička intervencija)

Poslovnička intervencija ide u smislu da ne dozvoljavamo više replike na diskusiju koje se

vodi o dnevnom redu. Pazite, bili ste u mogućnosti replicirati meni na poslovničku intervenciju, ali ni u kom slučaju kolegi Šeraku koji je diskutovao dnevni red. Zamolit ću vas da zaiste ne diskutujemo više o dnevnom redu, jer smo diskusiju bili iscrpili, kolegica je zaključila raspravu i molim vas da nastavimo dalje da usvojimo ovaj dnevni red. Dobit ćete prijedlog dnevnog reda ili izglasamo ili ne izglasamo, idemo dalje da radimo.

ALMA OMEROVIĆ – predsjedavajuća

Zaključujem raspravu i predlažem dnevni red.

ALAN ŠERAK – vijećnik SDP-a (poslovnička intervencija)

Kolega Eldar Šehić je imao krivi navod i ne možete zaključiti raspravu.

ELDAR ŠEHIĆ – vijećnik SDP-a (krivi navod)

Maloprije je gospodin Šerak u obraćanju rekao da smo mi možda pametniji od vas i mislim da je to krivi navod, jer mi ne možemo odlučiti ko je pametniji, mi samo razmišljamo svojom glavom i mislimo da nije po Zakonu ovo što sada treba da uradimo, a što je kolega Handžić sve objasnio.

ALAN ŠERAK – vijećnik SDP-a

U ime KV SDP-a tražim pauzu od pola sata.

ALMA OMEROVIĆ – predsjedavajuća

Ne možete tražiti pauzu od pola sata.

ALAN ŠERAK – vijećnik SDP-a

Zašto ne mogu? U ime KV SDP-a, po Poslovniku, tražim pauzu od pola sata.

ALMA OMEROVIĆ – predsjedavajuća

Dajem pauzu od 15 minuta.

Pauza od 10:55-11:05h.

ALMA OMEROVIĆ – predsjedavajuća

Raspravu smo zaključili, a obzirom da je izražena sumnja u glasanje dnevni red ću ponoviti:

1. Vijećnička pitanja i inicijative
2. Izvještaj o realizaciji zaključaka sa 29. sjednice
3. Informacija u oblasti zdravstva na području općine Ilijaš za period 01.01.2018.-31.12.2018. godine
4. Informacija o stanju sigurnosti na području općine Ilijaš za mjesec januar, februar i mart 2019. godine
5. Izvještaj JKP "Vodostan" d.o.o. Ilijaš o radu i poslovanju za period od 01.01.-31.12.2018. godine

6. Prijedlog Odluke o osnivanju Zdravstvenog savjeta na području općine Ilijaš
7. Prijedlog Odluke o izmjenama i dopunama Odluke o osnivanju mjesnih zajednica na području općine Ilijaš
8. Prijedlog Odluke o uslovima, načinu kandidiranja, održavanju izbora, dodjeli mandata u mjesnim zajednicama i razrješenju predsjednika i članova Savjeta mjesnih zajednica
9. Nacrt Odluke o definisanju prijedloga školskih područja za javne ustanove, osnovne škole na području općine Ilijaš
10. Prijedlog Odluke o naknadama za korištenje podataka Adresnog registra
11. Prijedlog Rješenja iz imovinsko-pravne oblasti
 - a) broj:06/1-31-373/19
 - b) broj:06/1-31-535/19

Predloženi dnevni red dajem na glasanje.

ZA su glasali sljedeći vijećnici: Šeherzada Ćosić, Anel Bumbulović, Vehid Halilović, Alma Omerović, Mehmed Sinanović, Adem Alić, Fahir Hasanović, Mirza Bektić, Semir Dedić, Halid Dizdarević, Rasim Šehić, Melisa Matoruga i Alen Hasković

PROTIV su glasali: Alan Šerak, Eldar Šehić, Mirsad Osmanović, Muhamed Handžić, Almir Špidić i Asim Mujić.

UZDRŽANI su bili: Semir Dizdarević, Besim Gljiva i Meho Džindo.

Konstatovano je da je OV-e sa 13 glasova ZA, 6 PROTIV i 3 UZDRŽANA usvojilo sljedeći

DNEVNI RED

1. Vijećnička pitanja i inicijative
2. Izvještaj o realizaciji zaključaka sa 29. sjednice
3. Informacija u oblasti zdravstva na području općine Ilijaš za period 01.01.2018.-31.12.2018. godine
4. Informacija o stanju sigurnosti na području općine Ilijaš za mjesec januar, februar i mart 2019. godine
5. Izvještaj JKP "Vodostan" d.o.o. Ilijaš o radu i poslovanju za period od 01.01.-31.12.2018. godine
6. Prijedlog Odluke o osnivanju Zdravstvenog savjeta na području općine Ilijaš
7. Prijedlog Odluke o izmjenama i dopunama Odluke o osnivanju mjesnih zajednica na području općine Ilijaš
8. Prijedlog Odluke o uslovima, načinu kandidiranja, održavanju izbora, dodjeli mandata u mjesnim zajednicama i razrješenju predsjednika i članova Savjeta mjesnih zajednica
9. Nacrt Odluke o definisanju prijedloga školskih područja za javne ustanove, osnovne škole na području općine Ilijaš
10. Prijedlog Odluke o naknadama za korištenje podataka Adresnog registra
11. Prijedlog Rješenja iz imovinsko-pravne oblasti
 - a) broj:06/1-31-373/19
 - b) broj:06/1-31-535/19.

ŠEHERZADA ĆOSIĆ – vijećnica SDA

Moja inicijativa je vezana za nedavni događaj sa tragičnim ishodom na području željezničke stanice Podlugovi 11.04.2019. godine. U dosadašnjem radu organa Vijeća roditelja moram da istaknem da općinski načelnik, pomoćnica načelnika Sanja Zagorac-Jozić aktivno sudjeluju i učestvuju na sjednicama Vijeća roditelja i u direktnom razgovoru definišu prioritete i u rekordnom roku pristupaju realizaciji istih. Znači, čvrsto sam ubjeđena da predstavnici lokalne vlasti su radili, uradili i radiće sigurno da se kvalitet građana općine Ilijaš podigne na što bolji nivo. Za početak smatram da je važno da se pokrene jedna inicijativa ka Željeznicama F BiH.

Inicijativa:

Pokrećem inicijativu da s uputi dopis ka JP Željeznice Federacije BiH da podhitno pokrenu radnje na postavljanju novih znakova zabrane kretanja prugom i opasnosti od visokog napona na području Mjesne zajednice Podlugovi, na području oko i uz prugu.

Želim napomenuti da imam materijal sa 25. sjednice OV-a Ilijaš, održane 28.11.2018. godine gdje smo imali istu inicijativu vijećnika Anela Bumbulovića koja je glasila:

"Pokrećem inicijativu prema Upravi Željeznica FBiH kako bi se organizovao sastanak sa načelnikom općine Ilijaš i predstavnicima Mjesne zajednice Podlugovi.

Obrazloženje: Na području Mjesne zajednice Podlugovi nalazi se velika površina zemljišta sa pravom vlasništva uknjiženom na Željeznice FBiH. Isto zemljište se nalazi u blizini OŠ "Podlugovi" i blizini ul.Žrtava genocida u Srebrenici (pomenuta ulica je jedna od najprometnijih). Ono što je evidentno da se gore navedeno zemljište ne održava adekvatno, te povremeno predstavlja potencijalnu opasnost za djecu koja se kreću prema školi".

Inicijativa je uredno dostavljena Željeznicama F BiH i do slanja materijala za sjednicu Općinskog vijeća nije stigao odgovor.

Pozivajući se i na ovu inicijativu i sve ono što sam danas izložila, pokrenula sam gore navedenu inicijativu.

ALMIR ŠPIODIĆ – vijećnik BPS-Sefer

Inicijativa:

Pokrećem inicijativu ispred građana MZ Podlugovi ulice Polomska, Žrtava genocida u Srebrenici, Moševačka, naselja Vratuša, Makljen, naselje Obala, Sovrle I i Sovrle II za izgradnju podzemnog prolaza za pješake ispod željezničke pruge od željezničke stanice u Podlugovima do ul.Žrtava genocida u Srebrenici.

Obrazloženje: Podsjećam Vas da je grupa građana MZ Podlugovi – ulica Polomska, Žrtava genocida u Srebrenici, Moševačka, sela Vratuša, Obala, Makljen, Sovrle I i Sovrle II, od dana 11.04.2019. godine do 15.04.2019. godine, nakon nesretnog slučaja smrti učenika SŠC "Nedžad Ibrišimović" u Ilijašu, Ramić Belmina, koji je smrtno stradao na

jednom od parkiranih vagona na Željezničkoj stanici u Podlugovima odlučila da pokrene inicijativu za izgradnju podzemnog prolaza za pješake ispod Željezničke pruge u Podlugovima, od ulice Žrtava genocida u Srebrenici prema autobuskoj stanici Podlugovi. Tokom prikupljanja potpisa za pokretanje inicijative za izgradnju podzemnog prolaza ispod željezničke pruge, građani su izrazili visok stepen nezadovoljstva i straha kako za sebe tako i za svoju djecu oko prelaska željezničke pruge u Podlugovima. Radi lakšeg razumijevanja ovog problema, želimo napomenuti da oko 3000 građana MZ Podlugovi, odnosno ovih ulica i naselja, najmanje dva puta u jednom danu prelazi prugu u oba smjera tj. iz ulice Žrtava genocida u Srebrenici prema autobuskoj stanici i obrnuto. Prilikom prelaska, skoro svakog dana na jednom ili dva željeznička kolosijeka, stalno je parkirano više od 25 teretnih vagona, oko 15 vagona zatvorenih cisterni sa gorivom, te svakodnevno u oba smjera prolaze vozovi u redovnom režimu saobraćaja. Zbog duge kolone parkiranih voagona i cisterni, građani ovih ulica i naselja prinuđeni su prelaziti preko platformi vagona ili se provlačiti ispod vagona koji su parkirani na željezničkoj stanici. Zbog nepostojanja obezbjeđenog prolaza u dužini od cca 50 m ispod ili iznad pruge, građani su primorani da se izlažu riziku kretanja preko željezničkih kolosjeka ili da pješače 3-5 kilometara kako bi došli do ambulante, autobuske stanice, tržnih centara itd. sa jedne strane željezničke pruge i do OŠ "Podlugovi" sa druge strane pruge. Kada građani i djeca prelaze vagone ili se provlače ispod, istim nije siguran prolaz zbog pomicanja tih kompozicija u momentu prelaska, kao i to da te parkirane cisterne, koje su uvijek bez nadzora radnika Željezničke stanice, mogu biti trenutna opasnost kako zbog goriva koje je u njima, tako i zbog električne energije, tj. visokog strujnog napona, koji je u gore pomenutom slučaju izazvao gubljenje/smrt jednog mladog života.

Pored gore navedenog, želimo naglasiti da učenici OŠ "Podlugovi" iz MZ Ljubnići i Lješevo takođe koriste obostrani prelazak preko željezničke pruge, tako da se i oni susreću sa ovim problemima prilikom dolaska i odlaska iz škole. Svim građanim i učenicima koji koriste javni prevoz iz Podlugova u pravcu Ilijaša i Sarajeva, takođe je otežan dolazak na autobusku stanicu Podlugovi, kao i odlazak u Ambulantu Podlogovi, te u prodavnice, ogrjeve, apoteke i druge objekte koji se nalaze u ulici Moševačka. Dana 15.04.2019. godine u 18:30 h, u prostorijama JU OŠ "Podlugovi" održan je sastanak Vijeća roditelja koji su takođe svojim potpisima podržali ovu inicijativu za izgradnju podzemnog prolaza za pješake ispod željezničke pruge u Podlugovima.

U ranijem periodu Vijeća roditelja OŠ "Podlugovi" je upozoravalo na ovaj problem nadležne u općini Ilijaš, PU Ilijaš i menadžment Željeznica F BiH, ali se do sada, iz nama nepoznatih razloga, nije našlo adekvatno rješenje za ovaj problem, tj. problem prelaska građana i djece preko željezničke pruge.

Na kraju ove inicijative želimo najiskrenije zamoliti, sve vijećnike Općinskog vijeća Ilijaš, da podrže ovu inicijativu i usvoje je kao zaključak shodno Poslovniku Općinskog vijeća. Da se odmah pokrene zakonska procedura rješavanja podzemnog prolaza za pješake ispod željezničke pruge u Podlugovima, a to podrazumjeva izmjene i dopune Regulacionog plana Podlugovi I. ako istim nije predviđen prolaz ispod pruge na pomenutoj lokaciji, pribavljanje određenih saglasnosti, izrada projekta itd.

Također, molimo službu Općinskog vijeća Ilijaš da ovu inicijativu, sa prikupljenim potpisima, uputi na sve relevantne adrese, odnosno institucije koje bi mogle pomoći rješavanju ovog problema: Vlada Federacije BiH, predsjedniku uprave-generalnom direktoru Željeznica F BiH, Federalnom ministarstvu prometa i komunikacija, Ministarstvu prostornog uređenja Kantona Sarajevo, Ministarstvu saobraćaja Kantona Sarajevo, Direkciji za ceste Kantona Sarajevo, Vladi Kantona Sarajevo, Skupštini Kantona Sarajevo i drugim institucijama koje bi mogle finansijski pomoći u izgradnji ovog podzmnog prolaza, jer građani MZ Podlugovi znaju da općina Ilijaš možda trenutno nije u mogućnosti sama

finansirati izgradnju podzmenog prolaza ispod željezničke pruge.
U prilogu dostavljam potpise građana MZ Podlugovi.

VEHID HALILOVIĆ – vijećnik SDA

Inicijative:

1. Pokrećem inicijativu prema MUP-u Kantona Sarajevo da se postavi stacionarni radar u ulici Moševačka.

Obrazloženje: Svjedoci smo čestih saobraćajnih nesreća i nezgoda na raskrsnici ulica Žrtava genocida u Srebrenici i Moševačka. I pored uređenja, odnosno proširenja navedene raskrsnice, bolje preglednosti i pored postavljenih saobraćajnih znakova upozorenja i ograničenja brzine od 40 km/sat, nesavjesni vozači voze čak i do 100 km/sat na tom dijelu puta. Samim tim ugrožavaju sigurnost i bezbjednost svih građana, a posebno velikog broja stanovnika Podlugova.

2. Pokrećem inicijativu prema nadležnoj službi da se postave nadstrešnice na autobuskim stajalištima u Podlugovima.

Obrazloženje: Potrebe velikog broja građana Podlugova je za uređenim autobuskim stajalištima obzirom da veliki broj građana, posebno učenika i studenata, koristi usluge međugradskog prevoza i da na postojećim autobuskim stajalištima nema adekvatne zaštite. U periodima velike kiše i vjetra, građani nemaju gdje da se sklone. Smatram da bi postavljanjem nadstrešnica umnogome olakšao putovanje našim učenicima i studentima.

MIRZA BEKTIĆ – vijećnik SDA

Inicijativa:

Pokrećem inicijativu da na neku od narednih sjednica Općinskog vijeća Ilijaš pozovemo odgovorne osobe Željeznica F BiH, da ih upoznamo sa problemom prelaza u Mjesnoj zajednici Podlugovi i problemima koje ti prelazi prouzrokuju. Zahtjevamo tačnu informaciju da li je planiran podvožnjak na ovoj dionici i obzirom da veliki broj učenika svakodnevno prelazi preko željezničke pruge. Također tražimo da se organizuje Tematska sjednica Općinskog vijeća Ilijaš na ovu temu.

ELDAR ŠEHIĆ – vijećnik SDP-a

Pitanje:

Kome ili kojoj općinskoj službi se može obratiti za sanaciju štete na javnim dobrima – putevima koju prouzrokuju izvođači radova na apartmanskim naseljima?

Obrazloženje: Kako smo svjedoci svakodnevnog uništavanja puteva i drugih dobara od strane izvođača radova na apartmanskim naseljima, želimo da se pronađe rješenje za sanaciju istih. Možda da se postave znakovi maksimalne nosivosti na tom putu. U protivnom, ako dođe do oštećenja puta, što već jeste, molim općinske organe da odgovore ko će tu štetu da sanira.

Inicijative:

1. Pokrećem inicijativu da općina Ilijaš, ako je u mogućnosti, jedan od parkova pretvori u park za vježbanje.

Obrazloženje: Svjedoci smo da se mladi ljudi u Ilijašu sve više okreću zdravom načinu života i treningu. Kroz razgovor sa mnogim mladim ljudima zaključili smo da je park tog vida neophodan u Ilijašu. Mladi ljudi trebaju puno više sadržaja u Ilijašu i oni to zaslužuju.

2. Pokrećem inicijativu za ocrtavanje linija na prigradskim putevima.

Obrazloženje: Nepostojanje linija na putevima koji nisu u centru grada je veliki problem, pogotovo za pješake koji svakodnevno prolaze te dionice. Zahtijevam od općine Ilijaš da djeluje u skladu sa mogućnostima i ta utiče na to da se te linije ocrtaju i da, ako je moguće, utiče na to da se te zadrže duže od dva mjeseca, jer smo svjedoci da linije koje se urade nestanu za dva mjeseca što je bio slučaj na dionici Ilijaš-Popovići.

MUHAMED HANDŽIĆ – vijećnik BPS-Sefer Halilović

Na prošloj sjednici OV-a sam imao dvije inicijative. Jedna od njih je bila pretovarena u Zaključak i moram reći zbog onih koji su zajedno samnom pokretači takve inicijative da je Zaključak poslat prema nadležnom ministarstvu Kantona Sarajevo. Zaključak se odnosio na uspostavljanje Centra za pružanje komunalnih usluga građanima Ilijaša, jer smo mi jedini u Kantonu Sarajevo koji nemamo ovu uslugu.

Druga inicijativa je bila da se formira Organizacioni odbor za obilježavanje Dana Armije i ta inicijativa koliko vidim nije prihvaćena. Tražio sam da u Organizacionom odboru budu: pomoćnik načelnika za boračko-invalidsku zaštitu i predsjednici svih udruženja. Takođe u sklopu te inicijative sam tražio da načelnik pokuša primiti 20-ak demobilisanih boraca, obavi razgovor sa njima, da to ne budu predsjednici Udruženja ili oni koji vode ta Udruženja, a mi znamo o čemu se radi. Znači, treba dati značaj demobilisanim borcima, a Udruženja rade svoj posao kako rade i misle da su "Bogom dati" da to rade.

Imao sam i dva pitanja. Jedno pitanje je bilo "Kada će nadležna općinska inspekcija poduzeti odgovarajuće mjere prema nesavjesnim poljoprivrednim proizvođačima na području općine Ilijaš koji zagađuju okoliš i ugrožavaju zdravlje ljudi odlagajući otpad (stajsko đubrivo) na deponije potoka i rijeka koje protiču kroz našu općinu".

Dobio sam jedan perfidan odgovor, ponižavajući i kako još da ga nazovem ja sam ne znam, ali je istina ono što sam rekao na prošloj sjednici OV-a da imaju veliku bojazan i inspektori i svi ovi koji su vezani u ovoj službi za ove probleme na koje građani stalno insistiraju. Znači, mi koji živimo u Ilijašu smo svjedoci ovog kada se ispušta đubrivo kod farme, preko puta nas u Kadarićima, mi se moramo skloniti na dan-dva da se ne otrujemo. Navest ću konkretan primjer, u Biočkom potoku gdje nizvodno stanuje cca 100 domaćinstava, to ne liči više ni na vodu ni na potok. Liči samo na stajsko đubrivo. Vode ne protiče, a protiče samo stajsko đubrivo. Inspektor mi je dao odgovor koji ja nisam tražio od njega, a to je da opet on nije nadležan i kao nadležna inspekcija u Kantonu Sarajevo pravi plan obilazaka, preduzimanja mjera, prema ovako neodgovornim poljoprivrednim proizvođačima. Dakle, to pitanje mu nisam postavio i taj odgovor može poslati nekom drugom. Ja ovo pitanje obnavljam i nadam se da će općinska služba biti toliko odgovorna i da mi, evo drugi put na postavljeno pitanje adekvatno odgovori, a ako ništa drugo, znam bosanski čitati i dobro razumijem probleme koje imaju građani Ilijaša.

Treće moje pitanje zbog čega sam danas tražio da se povuče tačka broj 5. sa dnevnog reda, a to je Izvještaj JKP "Vodostan" d.o.o. Ilijaš, je nažalost što ja njega moram sada pročitati ovdje, a direktorica nije prisutna da nam da adekvatno obrazloženje, jer šta god da pitam danas predstavnicu ovog preduzeća, neće mi dati odgovore kojima ću ja biti zadovoljan.

Tražio sam da mi JKP "Vodostan" Ilijaš dostavi podatke koliko je radnika u navedenom

preduzeću zaposleno u periodu od 2013. do 2019. godine po sljedećim elementima:

- ime, prezime i godina rođenja uposlenika;
- stručna sprema i zanimanje;
- na koje radno mjesto je primljen/a i
- uslovi prijema (određeno ili neodređeno).

Dobio sam izvještaj da je uposleno 13 osoba. Od njih 13, sedam je na neodređeno, a šest na određeno. Ovdje ste mi naveli sve podatke koje sam ja tražio, a tražio sam i školsku spremu i formacijsko mjesto na koje je neko raspoređen i godina rođenja. Kada sam vidio da ste zaposlili čovjeka od 60 godina, a on je po meni još malo i trebao već u penziju. Zaista mi nije bilo jasno čime ste se rukovodili. Ovdje sam takođe primjetio da niste proveli ni Zakon o dopunskim pravima boraca, a to je da opet pribjegavate slučaju zapošljavanja djece od dezertera. Ako me budete pitali ko je, morat ću vam imenom i prezimenom reći o kome se radi. Sada se neću rukovoditi time i ne želim imenom i prezimenom prozivati jednog po jednog radnika, jer to je najgore što bih mogao ovdje uraditi. Međutim, ako bi budete insistirali na tome, ja ću vam reći ko je u pitanju. Dakle, niz anomalija, niz propusta i u onom Izvještaju koji će doći na red kasnije i žao mi je što vas moram pitati, a nema direktorice i znam da je žena bolesna, tako da ovaj vaš Izvještaj će se naći na oglasnim tablama u užem centru grada, znači u ovom šetalištu. Na svako mjestu ću ovo okačiti i podcrtati olovkom i neka građani vide kako vi to radite. Ako je uredu, onda vjerovatno ja nisam normalan što to radim. Ako nije uredu, neka intervenišu što nije uredu. Znači, sa ovim prvim pitanjem, ja vam dostavljam ponovo ovo da mi odgovori nadležna općinska služba i ako mi ne odgovorite, morat ću pokrenuti postupak zbog ćutanja administracije.

Pitanje:

1. Kada će nadležna općinska inspekcija poduzeti odgovarajuće mjere prema nesavjesnim poljoprivrednim proizvođačima na području općine Ilijaš koji zagađuju okoliš i ugrožavaju zdravlje ljudi odlagajući otpad (stajsko đubrivo) na deponije potoka i rijeka koje protiču kroz našu općinu.

Obrazloženje: Ovo pitanje sam uputio i na prošloj sjednici Općinskog vijeća i dobio sam odgovor koji nema veze sa mojim pitanjem, niti se odnosi na problem koji treba HITNO riješiti. S tim u vezi, zahtijevam da se rješavanju ovog problema pristupi krajnje ozbiljno i odgovorno, a ne poltronski i pristrasno.

Inicijativa:

Pokrećem inicijativu da se u Ilijašu otvori centar za pružanje komunalnih usluga građanima naše općine.

Obrazloženje: Naime, građani naše općine su jedini u Kantonu Sarajevo koji nemaju mogućnost da svoje račune, koji im svakog mjeseca stižu – plate dostavljačima navedenih usluga, bez određenog iznosa poštarine koja u prosjeku iznosi od 5 do 10 KM po domaćinstvu. U tom smislu molim načelnika i nadležnu općinsku službu da iznađu mogućnost otvaranja ovog centra, a po ugledu na općinu Vogošća.

BESIM GLJIVA – samostalni vijećnik

Inicijativa:

1. Dostaviti zahtjev Direkciji za ceste Kantona Sarajevo da putem preduzeća koje

odražava put Donji Čevljanovići-Gajevi, što je u nadležnosti isključivo pomenute direkcije, izvrši sanaciju udarnih rupa i kanala koji se prekopani preko navedene dionice puta, a kojih je iz dana u dan sve više.

Koristim priliku da pozovem vijećnike i uposlenike općinskog organa uprave općine Ilijaš, a ovdje imam i pozivnice koje mi je dalo Udruženja RVI, da prisustvuju 23.aprila, obzirom da je 22. Uskrs, danu obilježavanja donošenja Odluke o organizovanju i pružanju otpora agresiji na BiH na širem području Srednjeg, a to se nalazi na širem platou Gajeva. Zamolio bih vas da prisustvujete ovom obilježavanju, jer su svi ovi naši datuma iz posljednjeg rata postali kritični u smislu da se jedva okupe kvorumi kako bi obilježili takve datume iz bliže istorije. Takođe želim reći da treba imati u vidu da su 2/3 126.Ilijaške brigade činili ljudi sa tog područja.

ELDAR ŠEHIĆ – vijećnik SDP-a

Pitanje:

Zašto se opet sjednice Općinskog vijeća zakazuju u četvrtak, jer vidimo da naš kolega Akif Bešlija ne može da prisustvuje sjednicama zato što prati suđenje našim ljudima iz Ilijaša? Čudi me kako nemamo sluha za ovo i kako se ne može pomjeriti da se sjednice održavaju srijedom ili nekim drugim danom. Mislim da postoji Zaključak da se sjednice ne održavaju četvrtkom, a ako ne postoji, ja evo predlažem da donesemo Zaključak da se sjednice održavaju utorkom, zbog našeg kolege Akifa Bešlije.

AKIF FAZLIĆ – općinski načelnik

Uz uvažavanje ove inicijative, nemojmo tako da samo jedan vijećnik ima obavezu prema ovim ljudima kojima se sudu. Dakle, svi mi imamo tu moralnu obavezu i svi mi tu obavezu iskazujemo na raznorazne načine primjerene onako kako i možemo iskazati. Ovo Vijeće je uvažavalo zaista tu inicijativu ili Zaključak praktično gotovo u cijelom jednom periodu. Ako se desi potreba da se Vijeće održi u četvrtak, nemojmo da pravimo “dramu” i pravimo “scenu” što moj imenjak Akif se hoće opredjeliti da prisustvuje svakom suđenju, jer ne sudi se njemu pa da mora uvijek biti prisutan, nego čovjek želi da na taj način da potporu. Nemojmo da čitavo Vijeće stavljam u kontekst jedne lične odluke, a potpuno podržavam, kad god je to moguće, da Vijeće nije četvrtkom, nego nekim drugim danom.

SEMIR DIZDAREVIĆ – samostalni vijećnik

Obzirom da se niko nije sjetio, samo da se zahvalim gradonačelniku grada Sarajeva Abdulahu Skaki na donaciji u vidu ramazanskog topa. Možda nisam čuo na početku ako je bilo, izvinjavam se.

ALMA OMEROVIĆ – predsjedavajuća

Niste čuli kolega, to smo planirali na kraju, ali u svakom slučaju hvala vam.

ALMA OMEROVIĆ – predsjedavajuća

Da li ostajete pri prijedlogu da se donese Zaključak.

ELDAR ŠEHIĆ – vijećnik SDP-a

Možemo donijeti Zaključak, ali ako načelnik kaže da to poštuje, onda nema potrebe. Samo ubuduće, da mi kolega Hasković ne govori da nije bilo Zaključka, ja bih volio da se donese Zaključak.

Znači, ostajem pri prijedlogu da se donese Zaključak da se sjednice OV-e ne zakazuju za četvrtak, nego nekim drugim danom za koji se dogovorimo.

ALEN HASKOVIĆ – zamjenik predsjedavajućeg

Zamolio bih kolegu Šehića da Zaključak formulišemo onako kako on može dobiti podršku, a ne da se obavežio da sjednice neće biti četvrtkom, nego da ukoliko je moguće da se sjednice ne zakazuju četvrtkom, nego nekim drugim danom. Ne vidim da je ovakav Zaključak sporan, a kolega Akif je imao ovakvu inicijativu i njemu je odgovoreno na tu inicijativu i ona se poštuje.

ALMA OMEROVIĆ – predsjedavajuća

Obzirom da ste konstatovali da postoji takav Zaključak, ne znam da li ima potrebe da ponovo donosimo isti Zaključak?

Konstatovano je da je vijećnik Eldar Šehić odustao od Zaključka., obzirom da se Kolegij OV-a Ilijaš očitovao o inicijativi vijećnika Akifa Bešlije, te da će se nastojati da se sjednice OV-a Ilijaš, ubuduće ne zakazuju, odnosno održavaju četvrtkom kao u dosadašnjem periodu.

AD-2

Izveštaj o realizaciji zaključaka sa 29. sjednice

Diskutanata po ovoj tački dnevnog reda nije bilo, pa je OV-e jednoglasno usvojilo

Izveštaj o realizaciji zaključaka sa 29. sjednice

AD-3

Informacija u oblasti zdravstva na području općine Ilijaš za period 01.01.2018.-31.12.2018. godine

AMRA MATORUGA – direktorica OJ DZ Ilijaš

Zdravstvena zaštita za stanovništvo općine Ilijaš u primarnoj zdravstvenoj zaštiti je pružana svakodnevno u prvoj i drugoj smjeni (gdje postoji više od jedan tim) u kontinuitetu, te nedjeljama i praznicima. I pored povremenog nedostatka ljekarskog i srednjeg medicinskog kadra, planirani zadaci su adekvatno i na vrijeme urađeni. Registracija stanovništva u timove porodične medicine je provedna kroz informacioni sistem, a svakodnevno se vrši registracija novih primljenih kartona, kao i deregistracija osiguranika koji prenesu zdravstveni karton u drugu ustanovu. Također, ovakvim načinom registracije nadležni ZZO svakodnevno evidentira osigurana lica, te time imamo uvid u broj osiguranika, koji je svakim danom manji što se tiče osiguranika na našoj općini. ZZO Kantona Sarajevo početkom 2017. godine naložio je Ustanovi da se svi neregistrirani pacijenti koji nisu odabrali porodičnog ljekara registruju u timove porodične medicine, tako da smo 2017. godine ažurirali kartoteku porodične medicine i sve postojeće kartone koji su postojali. Dakle, oni od prije rata i od 1996. ubacili u timove. Što se tiče posjeta, usluga i

opterećenosti timova i službi, sveukupno gledano broj posjeda na nivou organizacione jedinice za period januar-decembar 2018. godine je 14855 i pri tome je ostvareno 377740 usluga. Povećanje broja posjeta i usluga ponajviše je uočeno u Službi za radiološku i ultrazvučnu dijagnostiku kao i Pneumoftizilološkom dispanzeru, jer specijalista radiolog i pneumoftiziolog rade svih pet radnih dana. Također povećanje broja posjeta i usluga pripisujemo radu Službe za fizikalnu rehabilitaciju čije usluge smo u izvještajnom periodu 2017. godine imali u drugoj polovici godine, dok je u 2018. godini služba radila cijelu godinu. Što se tiče porodične medicine, u izvještajnom periodu u praksi je radilo uglavnom 9-10 radnih timova, uključujući direktora organizacione jedinice, dok su 2-3 ljekara bili odsutni po osnovu specijalizacije (3 ljekara), bolovanja i godišnji odmori. Uvođenje informacionih sistema u JUDZKS, a samim tim i u OJ DZ Ilijaš od posebnog značaja, a posebno propisivanje elektronskih recepata i tromjesečnog recepta. Problem predstavlja povremeni zastoj u "brzini" interneta, a posebno u područnim ambulantama, zbog čega se često moraju koristiti klasični (pisani) recepti, a njihova dostava je jako ograničena. Što se tiče kadra, u Domu zdravlja Ilijaš u odnosu na standarde i normative na osnovu kojih se vrši prijem, preraspodjela i finansiranje od strane nadležnih ministarstava i zavoda, možemo reći da imamo dovoljan broj kadrovskih profila u odnosu na broj osiguranika, odnosno stanovnika. Na nekim službama taj broj je veći od standardima propisanog, ali je optimalan u odnosu na potrebe stanovništva. Svakako da takvi standardi i normativi ne odgovaraju današnjim potrebama, te bi bilo potrebno iste mijenjati, ali to nije u našoj nadležnosti. Što se tiče potrebe za sredstvima u svakodnevnom radu, u toku protekle godine JUDZKS je za OJ DZ Ilijaš nabavila planiranu medicinsku opremu, obzirom da je postojeća već dotrajala, i to:

- za službu za UZ dijagnostiku UZ aparat sa pratećom opremom;
- za stomatološku ordinaciju u ambulanti Podlugovi stomatološku stolicu sa pratećom opremom;
- za službu za fizikalnu rehabilitaciju terapijski UZ;
- ostalu medicinsku opremu (autoklavi, sterilizatori i dr.), kao i
- računarsku opremu.

Zbog tenderske procedure, u toku protekle godine, nije se uspjela realizovati nabavka biohemijskog aparata za Službu za laboratorijsku dijagnostiku. Saradnja sa drugim zavodima koji su korisnici naših prostora (HMP, Zavod za javno zdravstvo i Zavod za zaštitu žena i materinstva) je zadovoljavajuća.

Broj usmenih i pisemenih prigovora na rad službi i osoblja je minimalan, a one koje se jave nastojimo da riješimo na nivou službe ili organizacione jedinice, što predstavlja posebno zadovoljstvo, kao i visok nivo korektnih kolegijalnih i međuljudskih odnosa osoblja. Planirani završetak radova na adaptaciji Bloka A Centralnog objekta, te pripadajućih pomoćnih objekata – garaža, koji se trebao realizovati kroz projekt Vlade KS – resornog ministarstva i općine Ilijaš budžetom za 2018. godinu, nije realizovan. U mjesecu avgustu u sklopu projekta utopljanja škola na području općine Ilijaš počelo je i utopljanje zgrade u kojoj se nalaze prostorije ambulate Kamenica, a radovi na istom su završeni polovinom novembra. Od planiranih Budžetskih sredstava općine Ilijaš za Dom zdravlja Ilijaš izdvojena su sredstva u iznosu 10.000,00 KM za nabavku zaštite za staklene površine (jedan dio zavjesa i jedan dio zaštitnih folija). Također je krajem godine odobrena popravka službenog i patronažnog vozila, na čemu smo ispred naše Ustanove veoma zahvalni.

Kao i do sada plan nam je svakodnevno pružanje usluga naših korisnicima i u 2019. godini, a u vezi sa tim i kadrovsko jačanje Ustanove. Projekti koji nisu realizovani u 2018. godini, kao što je nabavka službenog vozila od strane Ustanove, zatim projekt Vlade KS –

resornog ministarstva i općine Ilijaš, završetak radova na adaptaciji Bloka A Centralnog objekta, te pripadajućih pomoćnih objekata – garaža, nadamo se da će u 2019. godini biti realizovani. Jedan od planova za 2019. godinu jeste i utopljavanje zgrade ambulate Srednje. I naredni period radit ćemo na preventivnim programima, što uključuje unapređenje i promociju zdravlja, prevenciju bolesti, što je i tendencija naše Ustanove, a na obostrano zadovoljstvo uposlenika Doma zdravlja Ilijaš i pacijenata – korisnika naših usluga.

Još jedna informacija koja je vrijedna vaše pažnje, a to je upravo taj preventivni program koji se radi u predškolskom i školskom dispanzeru. Svjedoci smo u ovom periodu pojave epidemije zaraznih bolesti – morbila, koja je posljedica loše vakcinisanosti u dječijem uzrastu. Dom zdravlja Ilijaš od 1996. godine, a to svjedočim i znam, do danas uvijek je imao odgovorne i dobre pedijatre, kao i ljekara na školskom dispanzeru. Naravno, uz njih idu veoma edukovane sestre koje čine tim. Velika pažnja se posvećuje prevenciji i rezultat tog predanog rada je da je na našoj općini stepen vakcinisanosti 90%. Ako uzmemo u obzir da je ovo epidemija koja je zahvatila Kanton Sarajevo i da je na Kantonu ispod 60% procent vakcinisanosti, dakle mi smo presretni.

BELMA HAJDAREVIĆ - predstavnik specijalističko-konsultativne djelatosti DZ Kantona Sarajevo

Obzirom da često imamo pitanja za rad i organizaciju specijalističko-konsultativne službe napraviti ću vam kratak uvid kako smo mi organizovani. Znači, mi smo organizovani prema broju stanovnika, prema sistematizaciji. Opština Ilijaš, po zadnjem popisu ima 20.504 stanovnika. Tako smo i organizovali službu, a tu spada internistička, oftamološka, neurološka i otorinolaringološka služba.

Internistička služba – po broju stanovnika vama pripada dva dana internista i jedan dan dijabetolog.

Oftamološka služba – dva dana oftamolog.

Neurološka služba – jedan dan neurolog.

ORL služba – dva dana.

Tako smo sada organizovani. To vam je prema našoj sistematizaciji. S tim u vezi, moram vas upoznati da imamo veliki problem vezano za kadar. Mi smo u odnosu na prošlu godinu sa 15 ostali na 8 internista, a svi traže svoje tj. svaka opština želi da je pokrivena svih pet dana. To nije moguće za sada. Također drugi problem vezan za opštinu Ilijaš, konkretno za oftamološku službu, jest zastarjela aparatura s kojom mi sa strahom pregledamo pacijente bojeći se da šta ne pogriješimo. Da bi smo omogućili vašem stanovništvu da ostvare pravo na kvalitetnu zdravstvenu uslugu mi smo otvorili kalendar u Domu zdravlja Centar za stanovništvo Ilijaša, a hitan slučaj mora biti primljen na bilo kojoj opštini. Opština Vogošća ima pet dana oftamologa. Da bi zadovoljili vaše uslove doktorica radi pet dana i mi radimo po principu porudžbe. Porodični ljekari naručuju ne termin pacijenta, a hitan slučaj se prima odmah. E sada. Doktorica je ukinula te termine tako da ona prima svakog ko dođe. Jednostavno da bi smanjili broj čekanja. Vi često imate od nas odgovor da se čeka 60 dana. To nije 60 dana baš tako, jer mi pokrivamo samo dva dana. Znači, to je već pola. Duge su liste čekanja, to stoji, i ja vjerujem da su svi nezadovoljni. I mi nismo zadovoljni i voljeli bi smo da možemo pokriti kadrom, ali ga nemamo. Na zadnjem konkursu prije dva mjeseca koji je raspisan za 3 internista, samo su se 2 javila, od kojih se jedan premišljao. Znači, mi imamo veliki problem sa kadrom. Imamo volju da svima izađemo u susret, ali nemamo kadra i naravno oprema. Svake godine mi planiramo i dajemo svoje planove za opremu prema generalnom direktoru koji ide prema Ministarstvu zdravstva. Kao i svake godine i ove smo planirali, a već duže vrijeme nismo dobili nikakve opreme. Ove godine su

nam obećali da ćemo nešto dobiti. Sada ja vas molim, ako ste u mogućnosti, da nam pomognete vezano za opremu ili kadar. Dakle, da se i vi obratite Vladi Kantona Sarajevo i resornom ministarstvu, a naravno i mom generalnom direktoru.

ALMIR ŠPIODIĆ – vijećnik BPS-Sefer Halilović

Koristim priliku da se zahvalim doktorici koja je izdvojila svoje vrijeme da prisustvuje našoj sjednici, kao i direktorici Doma zdravlja Ilijaš. Ja sam jedan od onih koji je možda postavljao najviše pitanja, a to nisu moja pitanja, nego pitanja građana, tj. onih ljudi koji su me birali ovdje. Ja potpuno razumijem vas i vaše probleme kada je u pitanju kadar. Rekli ste da se broj uposlenika sa 15 smanjio na 8. Ovo izgleda kao u ratu i čini mi se da smo u ratu imali više ljudi koji su mogli i radili, nego u ovom periodu. Hoću da kažem da niste vi krivi tome. Očito je kriv sistem. Očigledno je da ovaj sistem i projekat porodične medicine nije zaživio u onom pravom kapacitetu kakav nam je prezentovan u onom pismenom dijelu kako su to nama najavljivali i prezentovali da će to biti, sasvim jedno idealno rješenje. Očigledno da se to u praksi kod nas, a najvjerovatnije zbog finansijskih sredstava, zbog lošeg imovinskog stanja građana, ne može primjenjivati. Definitivno, po ovom pitanju se mora nešto uraditi. Mene interesuje, da ljudi ulože toliko vremena u svoje obrazovanje, školovanje, a onda se raspiše javni poziv, i ovo je prvi put da čujem da se traže ljudi, a ljudi nema. Negdje sam pročitao da će nam trebati radne snage. Nije problem dovesti zidara, ali je problem za doktora. Je li treba neko da dođe iz Afrike da nas liječi. Šta je problem?

BELMA HAJDAREVIĆ - predstavnik specijalističko-konsultativne djelatosti DZ Kantona Sarajevo

Problem su privatne ustanove kojih se jako puno otvorilo i koje nude puno bolje uslove zdravstvenom radniku.

ALMIR ŠPIODIĆ – vijećnik BPS-Sefer Halilović

Dajte nam onda mogućnost da se mi kod privatnika liječimo i neka im plaća Zavod kojem mi plaćamo zdravstveno osiguranje.

BELMA HAJDAREVIĆ - direktorica specijalističko-konsultativne djelatosti DZ Kantona Sarajevo

To je do Zavoda zdravstvenog osiguranja i Ministarstva zdravstva.

ALMIR ŠPIODIĆ – vijećnik BPS-Sefer Halilović

Imao sam jedno pitanje vezano za stomatologa. Puno napora smo ulagali da dobijemo jednu stomatološku stolicu, pa da imamo stomatologa kao što direktorica reče na 2000 pacijenata u Podlugovima. Svi su se složili da nama fali stomatologa. Direktorica je upoznala generalnog direktora, on je upoznao uvaženu ministricu zdravstva koja dođe ovdje u Ilijaš na jednu od sjednica Vlade Kantona Sarajevo i priča nam o natalitetu kako je bolji natalitet u Kantonu Sarajevo nego u ZDK-u. Meni je žao što nisam bio u prilici da joj postavim pitanje. Na jednoj od sjednica u prošloj godini ministrica zdravstva je pričala o natalitetu u Ilijašu, umjesto o problemima građana i pacijenata. Znači, postavim to pitanje i ona kaže OK, fale nam zaista stomatolozi, poslali smo to Zavodu zdravstvenog osiguranja,

a oni to hladno odgovore da nemaju para za nove stomatologe itd. Mislim da je to vrlo ponižavajuće, taj sistem koji je postavljen da ne funkcioniše, i generalno ja mislim da bi ljudi koji imaju kompetentnosti to trebali da rješavaju i rješavaju ove probleme u smislu da se ljudima mora pružiti zdravstvena usluga. Ne znamo mi kada ćemo se razboliti i kada će nam nešto zatrebati. Ne može čovjek biti u bolnici sa dvije injekcije. Mi smo ovdje vrlo tolerantni. Kakve sve priče dolaze od građana, ja ih ovdje ne mogu ni iznijeti. Od građana koliko su nezadovoljni medicinskim uslugama. Ne kažem ja da je to baš tako, ali moram da vam prenesem da su ljudi stvarno nezadovoljni. Razumljivo je, kada nam dođu doktori iz Sarajeva, oni se ponašaju kao da su po kazni u Ilijašu. Vjerujte da je tako. Oni su nervozni, drski itd. Ja ih razumijem, jer treba proći Vogošćansku petlju, ustati dva sata ranije da bi na vrijeme došao na posao i dva sata kasniti sa posla kada krene odavde. Dakle, hoću da vam kažem da su građani Ilijaša vrlo nezadovoljni medicinskim uslugama koje se pružaju u Ilijašu.

HALID DIZDAREVIĆ – vijećnik SDA

Moja diskusija će biti slična kao i kolege Špiodića. Zahvaljujem se direktorici Amri Matorugi i Belmi Hajdarević. Vi ste nekoliko puta naveli da i vama treba neki vid pomoći s naše strane u smislu da poboljšate vašu medicinsku opremu i evo ja vas pitam na koji način mi to možemo uraditi? Da li je to Zaključak prema Vladi KS i Ministarstvu zdravstva da oprema koja je neophodna treba da bude u funkciji građana da građani ne bi bili nezadovoljni. Takođe i ja moram naglasiti da su građani nezadovoljni, puno čekaju na red kada dođu na pregled, da li je to utrazvuk, kod internista ili šta već. Bez obzira na ove informacije i činjenice što ste vi rekli da doktori pokrivaju kadrom kada je u pitanju broj stanovnika na području opštine Ilijaš. U privatnim ustanovama se ne čeka dugo. Ljudi nemaju strpljenja da čekaju dugo i za 40-50 KM idu kod privatnika da završe određene preglede, jer im je hitno. Neko ko je bolestan i kome treba neki nalaz ne može čekati zbog toga da li ime reagenasa ili ne, a u većini slučajeva nema. Naravno, niste vi krivi. Rekli ste da nemate kadra. Činjenica je da kada se učenici žele da upišu na Medicinski fakultet imaju veoma puno problema i to mi nije jasno, a fali nam kadra. Tako da generalno treba popravljati čitav sistem. Predlažem Općinskom vijeću da donesemo Zaključak prema Vladi KS i Ministarstvu zdravstva kada je u pitanju ova medicinska oprema i operatura koja je neophodna za preglede.

MIRZA BEKTIĆ – vijećnik SDA

Imam pitanje vezano za pedijatrijski odjel u Ilijašu, a to je da li vikendom radi pedijatrijski odjel i da li je u planu da se uvede rad ovog odjela, tj pedijatra subotom i nedjeljom, ako već ne radi, obzirom da imamo veliki broj predškolske djece i školskog uzrasta koji ovdje žive i stanuju?

ALEN HASKOVIĆ – zamjenik predsjedavajućeg

Moram da kažem da smo svi svjesni toga i konstatujemo da nismo upotpunsti zadovoljni pružanjem usluga zdravstvene zaštite pogotovo kada se odnosi na specijalističku službu. Kazali ste da je tu problem manjak kadra. Međutim, do mene dolazi informacija i sasvim mi je neprihvatljivo da pacijent, na oftamološki pregled ukoliko od danas da se naruči, treba čekati avgust mjesec da dođe na red. Ovaj općinski organ i Općinsko vijeće, općina Ilijaš i lokalna politika je zaista opredjeljena da unaprijedi sistem pružanja zdravstvene zaštite na području općine Ilijaš. To se svakao pokazalo u prethodnom periodu gdje je naš općinski

načelnik i lokalna politika u saradnji sa višim nivoima vlasti obezbjeđivali niz puta određena finansijska sredstva kada je u pitanju i uređenje Doma zdravlja Ilijaš i nabavka određenih aparata za pregled pacijenata. Zaista, o problemu specijalističke službe je trebao neko prije razmišljati. Da bi ste dobili jednog doktora specijalistu, prema mojim informacijama, a nisam te struke, treba vam pet godina da bi ste dobili jednog specijalistu. Ako mi danas znamo da određeni doktori specijalisti za pojedine oblasti će vrlo brzo ići u penziju, a da se ne određuju novi kadrovi koji će ići na specijalizaciju za određene oblasti i postavlja se pitanje u kojem pravcu ovo sve ide. Zaista sam ubjeđen da ovaj ovdje organ je spreman pokrenuti jednu vrstu inicijative i biti inicijator da ingerencije Doma zdravlja pređu na općinski nivo, a sve u cilju pružanja boljih usluga građanima naše općine, pa da onda mi imamo mogućnost, pod određenim uslovima da se to desi, da onda angažujemo određene specijaliste ugovorom o djelu, a sve radi pružanja boljih usluga građanima naše općine. Ne krivim vas pojedinačno, ni direktoricu Amru, niti vas Belma, jer stvar je viših nivoa odlučivanja, generalnog direktora i uprave Javne ustanove doma zdravlja, Zavoda zdravstvenog osiguranja itd. Na prošloj sjednici smo imali zaključak kojim se traži od Ministarstva zdravstva Kantona Sarajevo, JU Dom zdravlja Kantona Sarajevo i Zavoda zdravstvenog osiguranja Kantona Sarajevo da hitno obezbjede vozilo hitne pomoći za potrebe ambulate u Srednjem, obzirom da je isto bilo ranije pri ambulanti i pokrivalo širi rejon Srednjeg. Realizacija ovog zaključka je u toku. Ja ću sugerisati kolegama i nastojat ćemo da zaista dobijemo informaciju u narednom periodu šta se zaista dešava sa ovim Zaključkom. I evo, ako bude bilo potrebe, možda da načelnik sa političkim predstavnicima ili Kolegijem OV-a organizuje određenu vrstu sastanka sa novim ministricom zdravstva Kantona Sarajevo i sa JU Domovi zdravlja Kantona Sarajevo, možda i sa direktorom Zavoda zdravstvenog osiguranja i da vidimo šta možemo učiniti. Evo ovaj organ vam se svakako stavlja na funkciju i raspolaganje da ćemo učiniti sve da se nivo pružanja usluga zdravstvene zaštite na općini Ilijaš poboljša. Iako je problem nabavke tih nekih aparata, mi smo uvijek bili ti koji smo sredstva obezbjeđivali i u našem Budžetu i na neki način ih obezbjeđivali u Kantonu Sarajevo.

ALAN ŠERAK – vijećnik SDP-a

Da se nadovežem na svog prethodnika. Znam u kakvim uslovima vi radite i djelujete, manje-više sve javne ustanove u Kantonu Sarajevo, kao i javna preduzeća su na nekoj granici poslovanja. Jasno je da ovdje imamo problema, prije svega kada je bila politika na kantonalnim nivoima i jasno nam je neka ustanova čiji smo mi suosnivač bili trošila malo više sredstava i povlačila Zavod zdravstvenog osiguranja, odnosno Ministarstva zdravstva odnosno ustanove kojima smo mi osnivač, a govorim konkretno o Kliničkom centru Univerziteta u Sarajevu. Tako da ja želim vas ovdje da ohrabrim i dat ću vam svoj e-mail da dostavite šta to vama treba, pogotovo za OJ Ilijaš, jer generalno će se politika na kantonalnom nivou sada malo drugačije voditi. Čakamo da Upravni odbor Zavoda zdravstvenog osiguranja izabere novog direktora i tada treba sjesti sa novim ljudima i sa ministricom i definisati šta je to nulti prioritet kada je u pitanju OJ DZ Ilijaš. Ovo što je bila politika do juče, je neko zloupotrebom moći, a vi ste kolege iz SDA imali tu šansu da itekao provodite, a nažalost niste. Dakle, ta politika je definitivno doživjela svoj krah. Malo će se više u budućnosti finansirati ustanove čiji smo mi osnivači, a ne suosnivači. Ovdje opet konkretno govorim o Kliničkom centru Univerziteta u Sarajevu kojem mi dajemo dobar iznos sredstava, a nažalost usluge iz dana u dan sve više padaju i sve su gore i gore u odnosu kakve su bile. Ja cijenim da treba stabilizirati finansijsko poslovanje određenih ustanova. Međutim, to ne može da ide na uštrb pacijenata. Kao što juče neko reče na Skupštini Kantona Sarajevo "nije to GRAS". Sa tim stvarima se ne smije igrati. Želim s

vama da podijelim informaciju svakako podržavam da se održi ovaj sastanak sa novim ljudima naravno, jer vrijeme je svakao za novu politiku i da napokon opremimo naš Dom zdravlja jednom za sva vremena i da on pruža uslugu dostojnu svakom čovjeku.

RASIM ŠEHIĆ – vijećnik SDA

Prije svega, želim da pohvalim zdravstvene radnike i to treba da razgraničite, da kritika nije upućena zdravstvenim radnicima koji rade na terenu i daju svoj maksimum za razliku od određenih organizacionih jedinica i administracije tipa u Vrazovu kojih ima pretrpano, dok ovdje imate manjak zdravstvenih radnika koji moraju da mijenjaju svoje mjesto rada i da na taj način dolaze u kompleksiniju situaciju nego što je to trebalo da bude. Možemo iz svega ovoga da konstatujemo da situacija u oblasti zdravstva izgleda nikada nije bila teža, a da ne kažem da nikada nije bila gora. Ne mogu se samo složiti sa malopredašnjom konstatacijom ovo što svaki put miješamo politiku, pa čak i kada se složimo pogotovo što alfa i omega ko vodi ove procese jeste ministar koji ne dolazi iz reda SDA, ni prije, a ni ovaj mandat. To je jedna od konstatacija, a evo da se vratimo na trag problema obzirom da smo svi jednoglasni u mišljenju koje iznosimo. Mi ovdje vrlo često iznosimo konstruktivne prijedloge. Svjedoci smo, pomenuli smo Zaključak sa prošle sjednice, a kolege često iniciraju pitanja i inicijative vrlo značajne i konstruktivne. Mi živimo sa tim problemima i oni su ovdje vrlo kompleksni. U ovom izvještaju što sam čitao, za mene je porazna činjenica da imamo izgleda ulaganja samo od općine. Mi svi ovdje stojimo na raspolaganju što god treba da uradimo, ali morate shvatiti da su i nama "svezane ruke", da mi bilo kakav vaš pozitivan prijedlog možemo pretočiti u Zaključak koji ćemo poslati na adresu na koju vi kažete. Ja smatram da je adresa Ministarstvo zdravstva KS, ali evo i ustanove bilo koje za koje vi smatrate, slobodno nam predočite, a mi ćemo to u vidu Zaključka poslati gdje treba. Stičem utisak da kada bi se to finansiranje vršilo po pacijentu, čini mi se da mi iz neke naše prakse najbolje vodimo sami svoja lokalna preduzeća, domaćinski se odnosimo i mislim da bi najbolje bilo kada bi Dom zdravlja Ilijaš imao neku svoju samostalnost i ubjeđen sam da bi svi ovi ljudi kvalitetnije i bolje vodili ovu organizacionu politku.

MUHAMED HANDŽIĆ – vijećnik BPS-Sefer Halilović

Ja moram reći da smo mi u proteklom periodu poslali niz inicijativa i Zaključaka prema Ministarstvu zdravstva Kantona Sarajevo, Zavodu zdravstvenog osiguranja i svim relevantnim faktorima koji su nam mogli pomoći ovdje za provođenje zdravstvene zaštite naših građana. Uglavnom su ti naši Zaključci urodili plodom, ali na način da mi uložimo i značajna finansijska sredstva kao općina, da dovedemo na tu razinu. Međutim, nešto što mi ne možemo, a to je da obezbjedimo stručno osoblje, niti možemo poslati Zaključak u tom smislu da mi pomažemo. Znači, to nam neko mora obezbjeđiti ko je kompetentan za to, a zna se naravno ko je to i u tom smislu drago mi je što smo donijeli Zaključak na jednoj od sjednica da nema više naknadnih Zaključaka kada se usvoji Budžet. Mi smo obezbjeđivali i vozila, uslove za rad, obezbjeđivali smo i reagense, a sada smo došli u situaciju da nemamo ljudskih resursa. Ja sam na jednoj od ranijih sjednica Vijeća kada je na dnevnom redu bio ovaj Izvještaj naveo da je nama neophodan neuropsihitar u Domu zdravlja Ilijaš. To je nam tako izazvalo smijeh kao i sada. Međutim, činjenica je da smo mi trusno područje, pogotovo općina Ilijaš u koju su migrirali ljudi iz ratom uništenih, pobijenih, područja i djeca koja sada imaju 20 godina su svašta preživjeli i imaju nekada potrebu da se obrate toj osobi. U 2018. godini, koliko ja imam informacije, taj doktor je dolazio ovdje po dan-dva, pa ode na bolovanje, jer mu se vjerovatno ne sviđa ili ode na godišnji odmor ili specijalizaciju. Uglavnom, mi smo bili uskraćeni za taj resor i za potrebe neuropsihijatra.

I dalje tvrdim da je to jedan od gorućih problema i da ga treba podhitno obezbjediti. Ilijaš bude ovdje kao jedna arena i skoro sam hodao ulicom i vidio dvojicu kako se boksuju, vježbaju. Nisu agresivni, ali prave cirkus, oni su bolesni ljudi. Te ljude treba zbrinuti, liječiti. Ja iznosim činjenice i ono sa čim mi svakodnevno ovdje živimo. Mi za to ne možemo kriviti direktoricu. Ona radi izuzetno profesionalo i mi smo prezadovoljni sa njenim radom, njenim angažmanom i naporima koje ona ulaže ovdje da uspostavi sistem i da funkcioniše sa ovo malo ljudstva što ima, sa ovo malo kapaciteta sa kojim raspolaže u ovom našem Domu zdravlja. Ono što je simptomatično je da imamo više zdravstvenih kartona nego građana, po popisu. To je činjenica. Imamo 20050 po popisu i zadnja redukcija je bila 19000 ili nešto manje, a imamo 20300 zdravstvenih kartona. Od 20300 zdravstvenih kartona, ja tvrdim da ima najmanje 10% onih koji nikada ovdje nisu zatražili zdravstvenu zaštitu i nemaju zdravstveni karton. I ja sam jedan od njih. Dakle, u naš Dom zdravlja dolaze građani i Visokog, Breze, možda Vareša i svi oni koji osjećaju sigurnost zdravstvene zaštite u našem Domu zdravlja, jer mi smo Kanton Sarajevo, a oni misle da je to nama puno bolje i da smo ovdje puno sigurniji nego ovi koji nisu u Kantonu Sarajevo. Ne znam na koji način se boriti protiv ovoga. Mislim da su u CIPS-u donijeli neku Odluku, ako nisi prijavljen na adresi da ne možeš obnoviti ličnu kartu i sl., da stanu tome u kraj. Međutim, i to više nije barijera za one koji hoće da koriste benefite ovdje kod nas u Ilijašu i u Kantonu Sarajevo. Još jednom se zahvaljujem direktorici Doma zdravlja Ilijaša i njenoj kolegici oftamologu koji pružaju nadljudske napore da obezbjede da zdravstveni sistem u općini Ilijaš funkcioniše bar tako kako funkcioniše.

HALID DIZDAREVIĆ – vijećnik SDA

Na fonu diskusija mojih prethodnih kolega, zaista općina Ilijaš je uvijek bila na raspolaganju u svom kapacitetu sa općinskim načelnikom, sa Općinskim vijećem koje je uvijek bilo jednog stava, jednoglasno i to je urodilo plodom i u prethodnom periodu. Kad sagledamo sve, Dom zdravlja se nadgradio, napravili smo ogromne projekte u vidu ultrazvuka, fizikalne terapije i svih ostalih kapaciteta koje smo mogli da uradimo i svakako ove sastanke treba održavati sa čelnim ljudima i reći im da Kanton Sarajevo ne završava na Kobiljoj Glavi, da doktorima nije daleko Ilijaš, tom kadru koji fali, da život teče i u Hadžićima, Ilijašu i u svim općinama u Kantonu Sarajevo.

BESIM GLJIVA – samostalni vijećnik

Nadovezat ću se na diskusije prethodnih kolega. Što se tiče direktorice Doma zdravlja Ilijaš Amre Matoruge, sve pohvale za njen rad s terena. Prije svega, ja ću akcenat staviti na Dom zdravlja Srednje i ambulate Gajevi i Kamenica. Gospođa Amra je vjerovatno dugo ovdje sa pacijentima i najbolje poznaje problematiku i, po meni, je uložila najviše truda od svih prethodnih direktora Doma zdravlja. Međutim, njene su mogućnosti ograničene. Mi svi znamo, htjeli pričati ili ne, da politika određuje o svemu, pa i o zdravstvu. Politika postavlja doktore, medicinske sestre i vozače u domovima zdravlja, portire itd. Znači, odraz te politike je i Ilijaš. Meni nije jasno, a sjedim u ovom Vijeću dugi niz godina, kao i druge kolege, svake godine iz sjednice u sjednicu je priča o problemima zdravstva. Područje općine Ilijaš je, za one koji ne znaju, veoma kompleksno i čini gotovo 300 km² i od samog centra Ilijaša, do zadnjeg menjika oko granice je cca 60 i više km. Sada zamislite one građane koji žive u selu Vladajevići, Gajine, selu u kojem trebaju ujutru ustati i potražiti zdravstvenu uslugu recimo u Srednjem, a i to im je daleko, a kamoli Ilijaš. Nije mi jasno, kao stanovniku Kantona Sarajevo, čovjeku koji je ovdje rođen, da mi kao najjači Kanton (mi smo država u državi, imamo Budžet milijardu), da ni jedna politika do

sada, ne možemo kupiti vozilo hitne pomoći. Bolji je zdravstven sistem u Zavidovićima, nego na području Kantona Sarajevo ili Ilijaša. Kanton Sarajevo, zajedno sa ministarstvima, mislim da ima preko 500 vozila. Zavod zdravstvenog osiguranja mislim da ima Budžet preko 400 miliona KM. Sada mi "mlatimo praznu slamu" i tvrdimo kako možemo ili ne možemo, ali to sigurno možemo, to su pogrešne politike, Ilijaš je na periferiji tog Kantona i politike. U posljednje vrijeme su se dešavali određeni pomaci političkim uticajima. Meni je drago da je i kolega Šerak čak dao i neka obećanja nadolazećom i još novijom politikom. Međutim, ja i tu ne vidim rješenje. Po meni, ovo je opet "prazna priča". Naše uvažene doktorice su nama iznijele statističke podatke i one i nemaju veća ovlaštenja, nego iznijeti statistiku onoga što je na terenu. Njihove mogućnosti su ograničene. Ako one imaju neku pamentu ideju, osim statističkih podataka, neka kažu nama vijećnicima. Ja više neću obrazlagati problematiku ljudi koji žive u najudaljenijim dijelovima Ilijaša vezano za zdravstvo. Oni iz dana u dan uzimaju zdravstvene kartone i nose ih u Vogošću misleći da je tamo bolje, snalaze se putem hitne pomoći itd. Mislim da je ovo alarmantno stanje. Po meni, troškovi koje ima Dom zdravlja Srednje, ambulate koje mu pripadaju, to treba zatvoriti. To su ogromne pare koje se troše ni zašto (za plate uposlenika itd.). Ljekari na terenu se trude, ali sve je to, realno, nikakva usluga. Napisati uputnicu, procijeniti je li to ta dijagnoza ili nije, poslati nekoga dalje, to nije nikakva zdravstvena usluga. To je baš ovako, ja ni malo ne dodajem, niti ima primjesa politike u mom govoru. E sad, mi ćemo i dalje "iz šupljeg u prazno" prelijevati i to će tako trajati u ovoj opštini. Biće preče i Kantonu i raznoraznim ministarstvima ulagati pare u mnoge druge stvari, nego one zapravo koje su goruče, a jesu goruče. Zamolio bih uvažene doktorice neka otvoreno kažu, koliko smiju reći od svojih nadležnih, jer i one su politika, svi smo dio politike, šta bi to mi smjeli uraditi kao lokalna zajednica da napokon nešto učinimo. Evo imamo i novu Vladu, pa da vidimo imaju li oni neku ideju, ako ove prethodne nisu imale baš skroz zrele ideje. Daje da nešto uradimo za Ilijaš, pogoto s akcentom na ovo gornje područje gdje smo ljude vratili, napravili im puteve, stavili sijalice da gledaju u njih, a kada se tiče zdravstvene zaštite, to je bukvalno nula. Ponavljam, kome se još obratiti? Pa nepojmljivo je da mi ne možemo imati vozilo hitne pomoći na području koje ima 150 km² i da nemamo vozilo hitne pomoći kada ono košta neka mizerna sredstva, a imamo Kanton i naša općina je u Kantonu. To meni ne može niko objasniti.

AKIF FAZLIĆ – općinski načelnik

Slažem se sa svim diskusijama vijećnika koji su iskazali svu problematiku. U diskusijama, kao nešto i sebe krivimo. Mi ovdje nismo ništa krivi. Ustavna nadležnost za zdravstvom je na Kantonima. Kantoni raspolažu sa sredstvima, a Kanton Sarajevo raspolaže blizu pola milijarde KM. U Kantonu Sarajevo je preko 400000 stanovnika. Dakle, preko 1000 KM po stanovniku za usluge zdravstva. To pokazuje da i novci nisu problem. Ono što jeste s aspekta neke naše odgovornosti, a rekao sam nismo krivi ništa za zdravstvo, osim toga što nismo krivi, itekako smo u zadnjih nekoliko godina intenzivno ulagali iz vlastitog Budžeta i to se vidi i o tome ne treba pričati. Svi mi to znamo. Međutim, ima nešto što se zove Zakon o principima lokalne samouprave i Evropske povelje koje su vezane za lokalne samouprave i gdje je zdravstvo potcrtano kao nešto što treba približiti stanovništvu. Ono kako je je uspostavljen sistem zdravstva u Kantonu Sarajevo, on je udaljen od stanovnika, a to se najbolje vidi na primjeru Ilijaša, Hadžića i Trnova. Dakle, vidi se na primjeru donesenih standarda vezano za timove porodične medicine gdje je standard isti i za Centar i za Ilijaš i gdje je 1800 kartona isti i za Centar i Ilijaš. Dakle, evo to je prilika da promijenimo to i da kažemo da je u općinama od preko 300 km² sa ovakvim brojem stanovnika po 1km² standard bude drugačiji. Dakle, da približimo ljekare i usluge

zdravstva građanima, pogotovo u sferi porodične medicine. To će biti jedna od mojih inicijativa, a koje ćemo uputiti, prije svega, Ministarstvu zdravstva Kantona Sarajevo i naravno Zavodu zdravstvenog osiguranja za donošenje standarda ako žele da približe zdravstvenu uslugu, pogotovo primarnu, građanima. Znači, da imamo uspostavljene standarde na osnovi da prigradske općine gdje je razučeno stanovništvo, imamo neke bliže brojeve u odnosu na gradsku jezgru, jer tamo možete imati ambulanate na svakih 100-200 m. Naravno, pozicija ovih općina s aspekta privatne prakse, obzirom da su udaljene od centara, da se još uvijek razvijaju i nema toliko tog privatnog interesa koji je u osnovi profitabilni interes. Tako da i tu vrstu dobijanja zdravstvene usluge kroz razvoj privatnog sektora u ovim općinama je malo teže obezbijediti. Ja se zaista nadam i to je sinoć Skupština Kantona Sarajevo kroz raspravu o drugim temama najavila kao naredni mjesec dana da će tema zdravstva doći na red Skupštine, da se očekuje da se kroz Ministarstvo zdravstva sistemski pokrene niz aktivnosti koji trebaju da učine puno efikasnijim rad zdravstvenih ustanova u Kantonu Sarajevo.

Podržavam našu direktoricu i uposlenike u našoj Organizacionoj jedinici u Ilijašu, međutim ne podržavam menadžmen Javne ustanove. Ne možemo mi reći Zakon o javnim nabavkama, mi nemamo gore serviseru godinu, nego moramo kazati "zbog naše neorganizovanosti", neadekvatnog planiranja, nismo uspjeli napraviti ugovor o pružanju usluga vezano za održavanje vozila godinu dana. Dakle, to je dijagnoza. Problem nedostatka kadrova se ne može imputirati direktno ni jednoj javnoj ustanovi iz oblasti zdravstva, ali se zaista mora uputiti, ako ništa, Zavodu i ministarstvu. Zar Kanton Sarajevo, kao najbogatiji kanton, dolazi u problem da nema kadrova i da ne vodi kadrovsku politiku adekvatnu potrebama ovog kantona, a da ne kažem da bude neki support kad su u pitanju kadrovi i u regionu, izvan kantona. Dakle, to je nešto na čemu ćemo mi raditi i nadam se da će se otvoriti diskusija i priča oko nekih poteza značajnijih vezanih za zdravstvo na Kantonu i da ćemo mi u okviru tih priča tražiti i svoja rješenja. Ja sam ovdje na početku sa kolegicama iz javne ustanove rekao da hoćemo svoj pečat i potpis što znači da hoćemo javnu ustanovu u Domu zdravlja Ilijaš. Ako bude i to rješenje, naravno na polju plana i pozitivnih kriterija ići ka tim rješenjima. Rano se opredjeljivati još, ali suština jeste, ovo što je Besim govorio, da približimo zdravstvenu uslugu građaninu, a ne da naš građanin mora ići u Vrazovo zbog nekih običnijih stvari, pogotovo, opet se vraćam na porodičnu medicinu. Problem oko opreme – zaista to moram direktno imputirati menadžmentu Javne ustanove da se 2-3 godine ne može riješiti pitanje vozila i već nečega. Pričamo o nedostatku kadrova, pričamo o stomatologiji, a mi znamo da imamo osobu u Ilijašu koja je osam godina na Birou za zapošljavanje i ne može da dobije posao u DZ Ilijaš. To su teme koje ćemo mi sigurno otvoriti uz korektnu raspravu, korektne prijedloge i evo biće prilike da ovo Vijeće zajednički sve ovo sublimira, preciznije definira i da probamo zajedno sa ljudima koji vode zdravstvo u Kantonu Sarajevo, prevashodno Ministarstvo zdravstva i Zavod zdravstvenog osiguranja, probamo rješavati.

BELMA HAJDAREVIĆ - predstavnik specijalističko-konsultativne djelatosti DZ Kantona Sarajevo

Nama je povećan priliv pacijenata iz Kliničkog centra i Opće bolnice tako da imamo dodatno opterećenje, a nemamo dodatne tranše iz Zavoda zdravstvenog osiguranja. To treba da znate i vi ste upravu. Kada bi ste gledali s druge strane, medicinske, zaista se treba poštovati i taj nivo sekundarne, bolničke i vanbolničke, pa sekundarni nivo. Jednostavno svi gledaju da se rasterete, a kod nas je u Javnoj ustanovi povećan priliv pacijenata. Mi znamo da je površinski ovo velika opština i zato smo otvorili kalendare i u Vogošći i Centru tako da ljudi mogu i u drugu smjenu doći, jer nekima ne odgovara stalno

prva smjena, nego da dođe i u drugu smjenu. Naša sugestija je da pokušamo sa našim generalnim direktorom, pa i vi, možda dopunski rad, jer već tako funkcionise interna služba, ljekar ima dopunski rad i zato pokrивamo tu dva dana, jedan dan internista i drugi dan dijabetolog.

Diskutanata po ovoj tački dnevnog reda više nije bilo, pa je OV-e primilo k znanju

Informaciju u oblasti zdravstva na području općine Ilijaš za period 01.01.2018.-31.12.2018. godine

AD-4

Informacija o stanju sigurnosti na području općine Ilijaš za mjesec januar, februar i mart 2019. godine

IRFAN NEFIĆ – komandir PS Ilijaš

Informaciju ste dobili, a ono što mogu reći jeste da imam povećan broj prijavljenih krivičnih djela, a to ne piše u Informaciji, a odnosi se na teške krađe u vikend kuće. U proteklom periodu smo jednu grupu identificirali i pronašli. Nekoliko izvršilaca je sa područja Ilijaša, a imamo izvršioce iz Busovače. Dakle, radi se na dokumentovanju i rasvjetljavanju tih krivičnih djela i mogu reći da ima sada uspjeha u tome i nadam se da će procenat rasvjetljenosti biti veći nego što je sada. Takođe imamo povećan broj kontrolisanih vozila, kontrolisani osoba. Djelujemo preventivno, a pratio sam vaše prijedloge, izlaganja, sugestije i negodovanje vijećnika koji su prenijeli stavove građana što se tiče saobraćaja u blizini željezničke stanice, odnosno po mjesnim područjima i vjerovatno ste i vi mogli primjetiti da smo težište stavili na takva područja i sigurno svakodnevno naše patrole prođu od Bioče do Popovića i do gornjih krajeva, Polomskom, uz željezničku prugu. Uglavnom imamo naše patrole. Što se tiče stacionarnih radara, bilo bi dobro da imamo zahtjev vezano za fiksne radarske uređaj, prema MUP-u, a možda čak prema Upravi PS Ilijaš, pa bi mi proslijedili. To je malo skuplje i malo teže, ali ono što nemognemo fiksni, to ćemo moći našim pokretnim-mobilnim radarom. Ovdje treba naglasti da video nadzor koji je postavljen i pušten u rad da nam doista koristi. Imali smo već nekoliko slučajeva da smo nesavjesne vozače ili one koji nisu znali, a evo juče smo imali slučaj da je vozač ušao u pješačku zonu, pa smo to na snimcima pregledali, rasvijetili i sankcionirali takve vozače. Generalno gledajući, što se tiče javnog reda i mira, nemamo nekih posebnih problema, a stanje je kao u periodu prošle godine. Ono što mogu reći, a mislim da dijelim i vaše mišljenje, da je sigurnosna situacija u Ilijašu zadovoljavajuća s tim da uvijek može bolje. Mi smo se svakako potrudili da uradimo neke promjene na bolje, da poboljšamo u općem interesu. Prošli put smo imali primjedbu-sugestiju vijećnika Šeraka, vezano za dječija igrališta i naši policijski službenici su obavili određenu inspekciju, fotografisali su, napravili informaciju, a dio te informacije ste dobili u tromjesečnom izvještaju, a uradili smo i CD-e koji je u nadležnoj službi i možete pogledati. Bilo bi dobro da imamo informaciju ko gazduje dječijim igralištima, da se popravke urade kako ne bi dolazilo do povreda djece.

ALAN ŠERAK – vijećnik SDP-a

Imali smo Informaciju na godišnjem, nivou i zašto sa ovom Informacijom idemo kvartano. Samo zamaramo čovjeka. Nije mi jasno? Ako je to u Programu rada OV-a, onda to trebamo korigovati, jer ako je čovjek bio na sjednici i podnio izvještaj za cijelu godinu, zašto sada idemo kvartalno? Mislim da nema potrebe za tim. Po meni, dovoljno je jednom

godišnje da se dostavi Informacija.

ALEN HASKOVIĆ – zamjenik predsjedavajućeg

Želim da pohvalim ozbiljnost komandira i njegovu spremnost da podnese i kvartalni izvještaj ovom Općinskom vijeću i samim tim pokazuje da cijeni rad ovog organa. Čini mi se da je neko od kolega već imao inicijativu vezano za stacionarne radare i ako je treba ponoviti, uradit ćemo to. Takođe, želim vam čestitati.

Diskutanata po ovoj tački dnevnog reda više nije bilo, pa je OV-e primilo k znanju

Informaciju o stanju sigurnosti na području općine Ilijaš za mjesec januar, februar i mart 2019. godine

AD-5

Izvještaj JKP "Vodostan" d.o.o. Ilijaš o radu i poslovanju za period od 01.01.-31.12.2018. godine

SENADA ČIZMIĆ – rukovodilac službe računovodstva i finansija JKP "Vodostan" d.o.o. Ilijaš

Finansijski izvještaj za 2018. godinu, od strane eksternog nezavisnog revizora ocjenjen je pozitivnim revizorskim mišljenjem, te kao takav predstavlja fer i istinit prikaz kako imovine preduzeća tako i svih transakcija koje su se desile od 01.01.-31.12.2018. godine. Rezultat poslovanja u datom periodu jeste neto dobit u iznosu od 291.316,00 KM što je u odnosu na 2017. godinu cca 40% više ili 18%. Prihodi su povećani za 232.000,00 KM ili 11.4% u odnosu na uporedni period. Najveće povećanje imaju prihodi od naplate otpisanih potraživanja što pokazuje da preduzeće provodi aktivnosti na naplati starih dugovanja. Zatim, porast prihoda od pijace za cca 34.600,00 KM ili 110,65% više nego 2017. godine. Rezultat je, prije svega, otvaranje gradske tržnice. Odlukom OV-a, organizacija i upravljanje pijacom predati su u nadležnost JKP "Vodostan" d.o.o. Ilijaš. Mi smo nastojali da poslovanje na pijaci bude usklađeno sa svim zakonskim propisima na čelu sa Zakonom o unutarnjoj trgovini i evo na neki način su se ostvarili i određeni prihodi koji u ovo pola godine koliko je radila gradska tržnica u 2018. godini nisu bili baš dovoljni da namire troškove koji su nam izazvani predavanjem tržnice, ali biće to u ovoj godini. Ako posmatramo troškove izvještajnoj perioda, primjetit ćemo da su i oni porasli za 10%. Međutim, potrebno je ovdje i ja bih voljela naglasiti taj odnos između porasta troškova i porasta prihoda. Na svaku marku povećanja troškova, ukupan prihod je porastao 1,20 KM. Troškovi su porasli za nekih 186.000, 00 KM il 10% u odnosu na 2017. godinu. Najveće procentualno povećanje troškova, vidljivo je kod troškova projekata, računovodstvenih i revizijskih usluga za nekih 156% više nego u 2017. godini. Ovo objašnjavamo činjenicom da su u 2018. godini finansirana izrada projekta rekonstrukcije taložnice na Karašnici, filterskog postrojenja Sokolina, elaboratske učinkovitosti, te su takođe izvršena brojna geodetska snimanja rekonstruisanih i novoizgrađenih vodovodnih i kanalizacionih mreža. Sljedeći troškovi koji su imali značajnu tendenciju porasta jesu troškovi goriva, maziva i rezervnih dijelova. Ovo opravdavamo time što je u drugoj polovici 2017. godine značajno obnovljen vozni park preduzeća. Nabavljen je bager, kamion, tri teretna vozila Kedi, jedno putničko vozilo. U 2018. godini, nabavljeno je takođe jedno teretno vozilo što je naravno uticalo na porast troškova goriva i rezervnih dijelova. Pored navedenih troškova, porasla je i grupa troškova održavanja imovine preduzeća, odnosno stalnih sredstava. Kontinuirano ulaganje u stalna sredstva u preduzeću i modernizaciju poslovanja od Metering sistema,

sistema regulacije pritiska, monitoring sistema, preko filtera koji su u februaru 2018. godine pušteni u rad, iziskuje naravno i veće troškove održavanja. Ono što je važno istaći jeste da je preduzeće u 2018. godini sve svoje obaveze izmirilo u Zakonom propisanim rokovima, bez kašnjenja, da nemamo vanjskih niti unutarnjih dugovanja, te da nismo pristupili kreditnom zaduženju. Što se tiče investicija, naravno najznačajnija ulaganja u vodovodne objekte, vodovodne i kanalizacione mreže, išle su od osnivača preduzeća, odnosno općine Ilijaš, negdje cca 1.500,000 KM. I ove godine su potpisana dva sporazuma sa općinom kojim je uređeno rekonstruisanje i izgradnja vodovodnih i kanalizacionih mreža gdje se izgradilo oko 2200 m vodovodne i oko 2000 m kanalizacione mreže. Ukupna dužina novoizgrađene, odnosno rekonstruisane vodovodne mreže u 2018. godini bila je cca 3800 m, što znači da je preduzeće samo finansiralo 1600 m izgradnje, odnosno rekonstrukcije vodovodne mreže, dok je kanalizacione mreže cca 100 m. Pored pomenutih rekonstrukcija koje su finansirane od strane osnivača preduzeća, preduzeće je od vlastitih sredstava uložilo blizu 250.000,00 KM u nabavku sredstava za rad i modernizaciju, adaptaciju itd. Tako da je za nabavku rashladnih vitrina za tržnicu, čija nabavka je uvjetovana nadležnim propisima, utrošeno 55.000,00 KM. Zatim, izvršena je nabavka metalnog kontejnera na vodozahvatu na koji je priključena električna energija i na koji je postavljen sistem video nadzora prema zahtjevima nadležne vodoprivredne inspekcije, te je i ta investicija koštala cca 44.500,00 KM. Izvršena je kompletna adaptacija i rekonstrukcija rezervoara pitke vode od 3000 m³ vrijednosti cca 41.000,00 KM, zamjenjeni su stakleni portali na prostorijama zgrade uprave vrijednosti cca 14.300,00 KM, nabavljena su i ugrađena tri zonska vodomjera, tri radio modula, tri taklodera u iznosu od 15.500,00 KM, izvršena je rekonstrukcija vodovodne mreže – onih 1600 m koje je izvršeno o trošku preduzeća vrijednosti 26.800,00 KM i izvršena je rekonstrukcija kanalizacione mreže cca 100 m čija je vrijednost 9.000,00 KM. Što se tiče investicija, još bih spomenula, kroz dosljednu primjenu sistema Hasep sistema koji je uveden u 2017. godini izvršena je nabavka prilagođenog vozila, a testiranog za prevoz opasnih materija, te su i uposlenici obučeni za to. U periodu sastavljanja finansijskih izvještaja za 2018. godinu je uspješno završen i prvi nadzorni audit Hasep sistema, te prema riječima nezavisnog auditora nisu identifikovane nusaglašenosti u sistemu, a evidentna su brojna unapređenja koja se odnose na infrastrukturu i sveukupni sistem kontrolisanja i praćenja zdravstvene ispravnosti vode za piće što je u konačni i glavni zadatak ovog preduzeća.

RASIM ŠEHIĆ – vijećnik SDA-a

Sve pohvale, kako menadžmentu preduzeća, tako i upravi i upravljačkim strukturama. Kao što vidimo iz ovog izlaganja, Vodostan je postao preduzeće koje je rastuće, od malog preduzeća je prešlo u srednje i volio bih da se ta tendencija nastavi, pogotovo što imaju kapacitete i čini mi se da su na izuzetno dobrom putu da te kapacitete prošire, pa što da ne i proširenje samih djelatnosti koje oni rade. Ovdje u materijali samo dobili i vidjeli, za primjer, kako se radi finansijski izvještaj, kako u pogledu transparentnosti, tako i u pogledu same detaljnosti. Ova dobit koja je prikazana, višak prihoda nad rashodima, je odraz pozitivnog i ispravnog menažerskog upravljanja. Ovo nije neki frizirani, fiktivni izvještaj, kao što imamo vrlo često priliku vidjeti. Ovdje se radi o čistoj dobiti koja se mjeri stotinama hiljada KM koja sama po sebi govori na kakvom se putu nalazi ovo preduzeće. Izdvojit ću neke pozitivne stvari. Imamo jednu od najmodernijih hlornih stanica, svi smo sudionici projekta na vodozahvatu Vrutak koji je milionski projekat, a svi znamo šta to znači. Takođe, filter postrojenje Sokolina, a godinama smo imali zamućenje ove vode. Drago mi je da imamo i ova kapitalna ulaganja. Procenat naplate je povećan, a znamo da smo imali dugogodišnji problem po ovom pitanju. Ono što me interesuje i što ću postaviti pitanje,

jeste gubitak od 38% na vodovodnoj mreži. Pretpostavljam da je u pitanju stara i dotrajala vodovodna mreža, ali postavljam pitanje da li su to razlozi i nelegalni priključci, ali možda i priključci gdje smo imali problem sa paušalnim priključcima. Oni korisnici koji plaćaju paušalno, vjerovatno se ne mogu ni kontrolisati standardnim procedurama. Interesuje me šta se poduzelo i šta se poduzima po pitanju tih gubitaka na vodovodnoj mreži.

MUHAMED HANDŽIĆ – vijećnik BPS-Sefer Halilović

Neću ulaziti u datalje ovog Izvještaja, jer direktorica nije tu i žao mi je što je tamo gdje jeste. O njenoj profesionalnosti i ono što je sve do sada ona prezentovala ovdje nama, a već nekoliko Izvještaja je bilo, je suvišno govoriti. Dakle, to je profesionalac u svakom smislu i na tome direktorici čestitam. Međutim, ima nešto što mene interesuje, a to je kroz pitanja i inicijative i kroz sve ono što građani traže od nas kao vijećnika, prezentiram i šaljem na adrese. U ovom slučaju, ja sam dobio odgovor i nadam se da mi neće odgovoriti na pitanje ni pomoćnica direktorice ili koju već dužnost obavlja, a to je politika zapošljavanja ovih ljudi. Ovo je za mene jedan ekstreman proces zapošljavanja ljudi. Ako navedem 1968., 1959. godište i zaposlili se na dužnost tamo gdje može obavljati eventualno ograničeno sposoban čovjek te dužnosti, a to je čitanje vodomjera i sl. Vjerovatno tu ima nešto na što bi prije mogao odgovoriti predsjednik Upravnog odbora negoli direktorica ili zamjenik direktorice o čemu se tačno radi. Ovdje ima pola radnika koji su na određeno vrijeme primljeni, a mi se svi međusobno poznajemo, jer Ilijaš je mali grad i cijenim da se radi o vrijednim momcima, a i djevojkama koje, po meni bi trebalo, ako Vodostan pripada kategoriji srednjih preduzeća, da se ti ljudi prime na neodređeno, a ove koje ste primili prije par godina penzionišite ako imaju dovoljno radnog staža. Dobro bi bilo da se ovim pozabavimo. Ako se vi ne pozabavite ovim, menadžment i Upravni odbor, načinom zapošljavanja, doći će Vodostan u situaciju da ćete ih primiti previše, a neće imati ko raditi. Zašto? Ja ću za sve navesti primjer. Ovdje ste vi meni naveli stručnu spremu zaposlenih, naveli ste struku npr. metaloglogdač i vodoinstalater, a spremu vodoinstalatera je vjerovatno kupio u Širokom Brijegu. Tu treba ocijeniti stručnost tih ljudi koji rade na tim poslovima. Ili inspekcija ili iz Nadzornog odbora da povedete računa da ne budemo tamo više primili ovih što imaju 2-3 sumnjive diplome negoli oni koji će nam koristiti. Što i ovo govorim? Prije 10-ak dana vidio sam bivšeg uposlenika Vodostana Brišu koji je u penziji, a ekipa iz Vodostana je došla da otčepi kanalizaciju u ul.126.Ilijaške brigade ispred broja 102. i ne umiju. Morali su ići po Brišu da im čovjek pokaže kako to ide. E o tome govorim da trebate zapošljavati stručne ljude, a ne podobne. Ima onih koji naprave usluga i ovakvih i onakvih i vama i nama, ali na drugi se način vi njima revanširajte i zaposlite ih da rade ono što znaju i što neće boljeti glava sve nas. Od ovog će nas sigurno boljeti glava. Pozabavite se ovim imenima koje ste meni poslali, analizirajte dobro i njihovu struku provjerite jesu li sposobni da obavljaju te dužnosti, a neke od njih i penzionišite.

ALEN HASKOVIĆ – zamjenik predsjedavajućeg

Želim pohvaliti ovaj Izvještaj. Rad tog preduzeća, osim na papiru i ovom Izvještaju, zaista je vidljiv svaki dan i na terenu. Tamo je jedna upravljačka struktura i menadžment sa kojima se lako sarađuje i vrlo lako realizuju kapitalni projekti za koje je opredjeljena lokalna politika s ciljem unapređenja vodosnabdjevanja dugoročno na području naše općine. Kada je u pitanju zapošljavanje, ja ne bih taj segment nešto specijalno komentarisao, osim što bih rekao i smatram da ukoliko postoji potreba za određenim kadrovima da te kadrove svakako treba upotpuniti. Svjedoci smo da mi svako malo predamo na upravljanje određeni rezervoar JKP "Vodostan" i zaista njihov obim posla se u tom smislu povećava, a

kadrovski kapaciteti ostaju isti. Preduzeće ima 40-ak uposlenika i u posljednjih 4-5 godina taj broj se ne mjenja, varira od 2-3. Kada je u pitanju konkursna procedura, ne možemo mi nikome zabraniti da se prijavi na konkurs ako ispunjava uslove, bez obzira na njegove godine, ako je sposoban da radi. Ja zaista želim pohvaliti rad preduzeća u 2018. godini, pohvaliti povećanje prihoda i specijalno pohvaliti naplatu otpisanih prihoda.

MUHAMED HANDŽIĆ – vijećnik BPS-Sefer Halilović (replika)

Mislio sam da više ništa ne komentarišem, jer nema direktorice, ali ti me tako izazoveš. Svako se javi na konkurs, e kako si ti primljen, de mi reci. Nemojte o tome ljudi moji. Mi znamo kakva je filozofija zapošljavanja u BiH generalno. Znamo kakva je filozofija zapošljavanja u Fedraciji BiH, Kaotnu Sarajevo i općini Ilijaš. Nemojte me izazivati da ja sada pričam kako je došao onaj čovjek od šezdeset godina da radi i neću da pominjem njegovo ime da ugrožavam njegovu egzistenciju i egzistenciju njegove porodice. Nemojte to raditi. Ako ne znate objasniti kako je neko primljen, onda šutite. Izazivate me da vam kažem i da idem u datelje, ali nemojte to raditi.

ALEN HASKOVIĆ – zamjenik predsjedavajućeg

U repliciranju kolega je pitao kako sam ja primljen na posao. Moram vam reći da sam primljen preko javnog poziva za zapošljavanje zlatne značke Univerziteta u Sarajevu.

MUHAMED HANDŽIĆ – vijećnik BPS-Sefer Halilović (replika)

Ja tebe znam kao uljudna i dobra momka i zlatnu studentsku značku. Sve znam o tebi. Što se tiče tebe sve je uredu, ali ja govorim kroz ove procese kako to ide i kako se to radi. Sad ti nešto hoćeš meni objasniti, kao kolega Šehić što čestita na Izvještaju, a nije se ni počelo raspravljati. Direktorici Zukić se može čestitati uvijek. Ona odgovorno radi svoj posao. Postoje ometači koji učestvuju u upravljačkim strukturama Vodostana koji joj ne daju da radi kako treba. Ona bi bila vrhunski direktor, rukovodioc da ima pravu podršku, podršku upravljačkih struktura. O tome mi trebamo pričati, a ne da joj neko u preduzeće zapošljava čovjeka od šezdeset godina.

HALID DIZDAREVIĆ – vijećnik SDA

Čestitam direktorici i slažem se sa kolegom Handžićem na njenoj sposobnosti. Samo ću kratko reći nekoliko stvari, a vezane su za rad uposlenika. Ne možemo reći da su svi oni neznalice, jer i ja lično poznajem nekoliko ljudi. Gospodin Brišo jeste u penziji i on je ustvari čovjek koji poznaje svaku instalaciju na općini Ilijaš kojaj je postavljena prije desetine godina i on asistira na svakom radu kada su u pitanju instalacije čisto da se ne bi vršila velika šteta prilikom iskopa itd.

ALMIR ŠPIODIĆ – vijećnik BPS-Sefer Halilović

I prošli put sam sugerisao na nešto što vi loše radite. Kritika bi trebalo da mijenja stanje. Pozitivnom kritikom bih htio da vam skrenem pažnju na prokope koje vi radite u cnetru grada Ilijaša. Uništili ste nam trotoare koji su poprilično skupo plaćeni u ul.Ivana Franje Jukića i u ovom dijelu Kakanjske gdje ste radili prokope. Svi smo svjedoci kako ti trotoari sada izgledaju. Prošli put sam sugerisao da svoje radove vraćate u prvobitno stanje, jer ste dužni da to tako uradite. To je jedna mala zamjerka i nadam se da ćete vi to popraviti.

Čestitke na finansijskom rezultatu za proteklu godinu. Čestitke posebno načelniku Akifu Fazliću i čestitke posebno uvaženoj pomoćnici načelnika Merimi Osmanović. Da budemo sasvim jasni ovdje. Vodostan ima svoju zaslugu u smislu onoga što za razliku od prethodnog menadžmenta radi određene stvari koje oni nisu htjeli raditi, a tiče se rekonstrukcije vodovodne mreže. Druga stvar, čestitka nama ovdje u Općinskom vijeću što smo izglasali Odluku da uvodimo mjerno mjesto, koje jeste 2 KM po korisniku, što u konačnici donosi 140.000,00 KM dobiti godišnje. Dakle, mi smo to uradili. E sada iz ove prezentacije koju ja ovdje vidim i ovih svih hvalospjeva, mi smo uspjeli i kao osnivač smo zadovoljni, razviti naše preduzeće do te mjere da stabilno finansijski posluje i da je adekvatno opremljeno. Mi smo to uspjeli. S obzirom da su se stekli takvi uslovi, ja sada pitam da li je možda vrijeme da uvodimo socijalni aspekt po pitanju građanstva općine Ilijaš, da stavimo van snage Odluku koja se tiče mjernog mjesta. Hoćemo li tako razmišljati? Ovo je bila mjera da izvršimo stabilizaciju poslovanja ovog preduzeća. Mi smo to uspjeli, obnovili vozni park, obnovili sredstva rada i u konačnici imamo 250.000,00 KM dobiti. Sada se, po meni, stiču uslovi da mi, politički gledano, uvedemo socijalnu mjeru da li da smanjimo cijenu koštanja 1m³ vode građanima ili da li da ukinemo ono što se zove mjerno mjesto. To smo mi dužni prema građanima i o tome se da sada raspravljati. Nemojte zaboraviti, pogotovo kada je u pitanju operativni rad našeg JKP "Vodostan" da se vaša uspješnost ogleda u tome da onaj tamo objekat koji koštao cca pola miliona KM bude svaki dan u funkciji. Govorim o tržnici. Ogromna sredstva smo uložili u istu, da bi ona radila samo subotom. E tim se pitanjima moramo pozabaviti. Ili ćemo dozvoliti da ono onako prazno stoji i zjapi samo se urušava. Je li mi smatramo da je u onaj objekat uloženo pola miliona maraka da bi stajao prazan. Ja mislim da je to onda fula investicija kao što jeste. Ono treba da radi. Ono što je kolega Handžić zaboravio pitati, a tiče se upošljavanja i ne moraš mi ti Senada odgovoriti, jer se to tebe ne tiče, a tiče se direktorice, kako i na koji način je ove ljude primila? Napomenut ću, mislim da je bila 2013. ili 2014. godina kada je ovo OV-e donijelo Zaključak, kao osnivač, da se ubuduće sva zapošljavanja u tom javnom komunalnom preduzeću vrše putem javno konkursa. Zaključkom vas osnivač obavezao, a lično sumnjam da je sve ovo išlo putem javnog konkursa. Svakako ću tražiti da mi se pismeno odgovori na ova pitanja.

AKIF FAZLIĆ – općinski načelnik

Dakle, potpuno se slažem da su ovo čestitke za sve nas. Svi smo zajedno definirali politiku koja je značila poboljšanje u oblasti vodosnabdijevanja, znači od Općinskog vijeća, općinskog načelnika i naravno onih koji su konkretni provodioci takvih odluka, a to je naše javno preduzeće. I mislim da su svi u svojoj sferi odgovornosti i nadležnosti dali puni doprinos da imamo danas ovakav rezultata. Međutim, mi danas raspravljamo o Izvještaju našeg javnog komunalnog preduzeća. Dakle, i kada raspravljamo o radu Općinskog vijeća i općinskog načelnika biće prilike da detaljnije govorimo o našim rezultatima, ali zaista može se u jednom paketu kazati da je ovo uspjeh sviju nas. Ali, ponovo ponavljam danas raspravljamo o Izvještaju JKP "Vodostan" koji je od 1996. do danas, po svim parametrima, jedan od najboljih, sa finansijskim, investicionim i svakim drugim. Šta je tu važno? Dakle, važni su trendovi koji su uspostavljeni. Uspostavljen je trend da od 2016. godine više nema gubitaka, a do 2016. godine bili su stalno gubici i oni se kumulirali. Jesmo li i mi pomogli da tih gubitaka nema, jesmo. Je li to uspješno realiziralo naše javno komunalno preduzeće, jeste. I dakle, čestitke. Također kada je u pitanju zapošljavanje ja se potpuno sa Muhamedom slažem. Ne trebamo mi sada pričati priče i žmiriti zbog ovog i onog.

Od reintegracije do danas, zapošljavanja bila ovakva i onakva. Je li se počela uređivati oblast, jeste. Ja mislim da je naše javno komunalno preduzeće, a sada sam to provjerio sa Senadom, možda prvo, a možda i jedino u Kantonu Sarajevo koji je već implementirao u svoje akte Uredbu Vlade Kantona Sarajevo o zapošljavanju u javnim preduzećima gdje je osnivača Kanton ili općina više od 50%. Mada, mi smatramo da ta Uredba nije zakonita i ustavna, jer su tom Uredbom uneseni neki organi koji nisu u osnovnom Zakonu, nisu definisani Zakonom o radu. Dakle, Uredba je na snazi, ona se mora primjenjivati dok se ne dokaže njena nezakonitost ili dok se ne promjeni. Mislim da je naše javno preduzeće trenutno jedino koje je implementiralo tu Uredbu, a to znači uvođenje supervizora u zapošljavanje. Hoću da kažem da se opredjeljeno da se i oblast zapošljavanja stavlja, ovo što svi želimo, a Muhamed je to najviše istakao, pod kontrolu da dođemo do onoga što jeste svima nama cilj, a to je jednaka prava za sve i jedinstven kvalitet. Mislim da kroz taj potez naše komunalno preduzeće i time pokazuje tu vrstu opredjeljenosti i time pokazuje tu vrstu odgovornosti. Može li biti još poboljšanja? Naravno da može. Evo Alan je govorio i o pijaci, a i moja je želja da tržnica radi svaki dan. Vidimo finansijske rezultate i oni su duplo veći i treba da taj objekat i kapacitet bude što više u funkciji.

Ovo što je spomenuto za prokopavanje je tačno. Ja znam problematiku prokopavanja. Obaveza firmi, po Pravilniku Kantonalnom, da morate imati firmu koja održava javni prostor. Ako je to regionalna cesta, znači firma sa kojom Direkcija ima ugovor ili ako imate neke druge javne površine gdje neko drugi njima upravlja, dakle sa firmom koja je ta javna ustanova sklopila ugovor i onda dođete u poziciju da je to teško sve realizirati, jer su to sve mali zahvati i gdje treba natjerati firmu da to realizira. Međutim, ne želim samo kazati da to treba samo konstatirati, to moramo ozbiljnije stavljati na dnevni red i ozbiljnije popravljati. Želim iskoristiti priliku da čestitam menadžmentu, da čestitam upravljačkim organima, nadzornom odboru, skupštini i želim da nastave sa ovim trendom poboljšanja. Dakle, sigurno prostora za poboljšanje ima i da do iduće godine dobijemo još bolje rezultate.

ALAN ŠERAK – vijećnik SDP-a

Da se predlagač izjasni da li su se stekli uslovi da se stavi van snage mjera po pitanju uvođenja naknade za mjerno mjesto.

AKIF FAZLIĆ – općinski načelnik

Ovaj prijedlog ne bih vezao za ovu tačku dnevnog reda. To je politika osnivača i mi možemo razmišljati o raznim mjerama (o povećanju cijena, smanjenju cijena, usvođenje ovoga i onoga), ali to treba da bude zasebna tačka dnevnog reda. Znači, danas govorimo o Izvještaj i da to sada ne miješamo.

ALAN ŠERAK – vijećnik SDP-a

Išlo je na prijedlog preduzeća. Prijedlog za tu mjeru je došao od strane preduzeća i onda smo mi taj prijedlog Odluke usvojili. Generalano, politika javnih preduzeća je da imamo, pod broj 1. da imamo kvalitetnu uslugu, broj 2. zadovoljni uposlenici i 3. da je ono dovoljno opremljeno da može vršiti te usluge na odgovarajući način.

Ja mislim da smo mi to sada postigli lično. Sada imate situaciju da imate dobit iz godine u godinu, preko 200.000,00 KM. Šta će se raditi sa tom dobiti? Koliko još ima akumuliranog gubitka? Znači, narednih pet godina, a imali ste i primjedbu Nadzornog odbora zato što to niste radili u prethodnom periodu. Znači, mi bi po toj vašoj logici trebali doći u situaciju da

za nekih pet godina razmatramo ovu moju mjeru.

Evo nećemo danas raspravljati o ovoj mjeri, ali predlažem načelniku da za jednu od narednih sjednica Vijeća predloži i stavi na dnevni red tu jednu vrstu mjere, pa da o njoj raspravimo i da se o njoj izjasnimo.

RASIM ŠEHIĆ – vijećnik SDA (replika)

I ja bih da se nadovežem na ovo. Svi smo aktivno učestvovali u donošenju Odluke kada smo odlučili da se uvede ovaj namet. Sjećam se dobro da je dobar dio OV-a negodovao i izrazio protivljenje kako je to nedopustivo. Sada se hvalimo kako je ta Odluka rezultat svih nas i djelimično ili dobrim dijelom doprinijela ovakvom finansijskom rezultatu. Postavljam sebi pitanje, ako imamo ovu dobit i ako je to doprinijelo investiranju, saniranju gubitaka, dugova koje je imalo preduzeće, zašto onda uopšte postavljati pitanje da oduzimamo, da "sječemo žilu" preduzeću koja ga izvodi na trasu rastućeg i uspješnog preduzeća? Evo uzet ćemo i našu cijenu vode koja je vjerovatno najniža u Kantonu Sarajevo 0,70 pfeninga/1m³, a znamo kakve su sada klimatske promjene, kakvi su i trendovi, a znamo i koliko košta jedna flašica vode. S tim u vezi, apsolutno se ne slažem za ukidanje navedene mjere i mislim da ćemo u budućnosti koliko god to bilo nepopularno, biti suočeni, možda ne mi, ali neko naredno Vijeće koje smogne hrabrosti da i ovu cijenu vode koriguje kako bi mogli još više napredovati i time preventivno uticali na smanjenje troška vode koja je potpuno ispravna za piće u neko zalijevanje. Znamo u ljetnom periodu da imamo redukcije i sa čime se sve suočavamo.

MUHAMED HANDŽIĆ – vijećnik BPS-Sefer Halilović (replika)

Slušajući kolegu Šehića, a prije toga Kolegu Šeraka, daje mi povoda da diskutujem u ovom pravcu. Prvo, menadžment preduzeća nije ostvario ovu dobit. Ovo je dobit iz džepova građana. Kada smo "zavukli ruke" 2016. godine u džepove građana i uzeli im po 2,00 KM sa svakog računa, nije sa paušala, i to je 200.000,00 KM godišnje firmi. Oni su poslovali tako kako su poslovali, pozitivno. Ne bih ja kolega Šerak vraćao ta sredstva nazad. Ako smo već "zavukli ruku" u džepove građana i uzeli im, neka oni sada trpe. Što? Mi na općini Ilijaš imamo 30% praznih stambenih jedinica. Neka nam plaćaju po 2,00 KM. Radije bi da samanjimo cijenu 1m³ vode, nego da ukinemo plaćanje mjernog mjesta-sata. Drugo, sada da mi pričamo kako smo sposobni, odjednom smo izašli iz krize, nismo u gubicima, a znamo mi zbog čega smo u gubicima i da se nama oda priznanje. Šta će se nama odavati priznanje kada smo "zavukli ruke" u džepove građana.

Diskutanata po ovoj tački dnevnog reda više nije, pa je OV-e jednoglasno usvojilo

Izvještaj JKP "Vodostan" d.o.o. Ilijaš o radu i poslovanju za period
od 01.01.-31.12.2018. godine

Uslijedila je pauza od 13:50-15:00 h.

AD-6

Prijedlog Odluke o osnivanju Zdravstvenog savjeta na području općine Ilijaš

SANJA ZAGORAC-JOZIĆ – pomoćnica načelnika

Komisija za statut i propise nije imala primjedbi na pravni osnov i pravno-tehničku usklađenost, a tehničku grešku smo ispravili. Ovdje se radi o jednoj tehničko stvari koja je

zadata Zakonom o zdravstvenoj zaštiti i Zakonom o pravima, obavezama i odgovornostima pacijenata gdje je obaveza lokalne zajednice da osnuje Zdravstveni savjet na svom području i ovom Odlukom, praktično se definišu nadležnosti, zadaci, broj članova, sastav, način rada, a svakako i način formiranja samog ovog Zdravstvenog savjeta. Zakon je donesen 2010. godine. Mi smo malo ustuknuli pred donošenjem jedne ovakve Odluke, jer smo vidjeli da općine u okruženju koje su formirale ove Zdravstvene savjete da u principu oni nisu bili u funkcionalni. Na poslaničku inicijativu u Skupštini Kantona Sarajevo na četvrtoj sjednici gdje je zastupnik Handžić tražio da se napravi analiza koje općine imaju formirane Zdravstvene savjete, dobili smo jednu Instrukciju Ministarstva zdravstva Kantona Sarajevo da, ukoliko općina Ilijaš nema formiran Zdravstveni savjet, da ga formira. U tom smislu, ovakav prijedlog Odluke je proizašao iz ove Instrukcije. Znači, članovi Zdravstvenog savjeta birat će se putem Javnog poziva. Na osnovu tog poziva i određenih kriterija će biti imenovani od strane općinskog načelnika. Odlukom je definisano koji to predstavnici treba da uđu u ovaj Savjet. Nadam se da ćemo dobiti jedan funkcionalan Zdravstveni savjet, jer se radi o jednoj maloj lokalnoj zajednici gdje se svi relativno dobro poznajemo i da ćemo imati i predstavnike i zdravstvenih ustanova, privatnih zdravstvenih praksi, apoteka, veterinarske stanice i da će to biti jedno tijelo koje će malo dati zamaha svim ovim inicijativama koje su donesene razmatrajući i Informaciju iz oblasti zdravstvene zaštite na području općine Ilijaš. Predlažem OV-u da Odluku podrži u predloženom tekstu.

ALAN ŠERAK – vijećnik SDP-a

Zanima me visina naknade članovima Zdravstvenog savjeta. Znači, kolika je naknada i hoće li se plaćati mjesečno ili po sastancima?

SANJA ZAGORAC-JOZIĆ – pomoćnica načelnika

Naknada za rad Zdravstvenog savjeta definisana je Odlukom Općinskog vijeća o visini naknada vijećnicima, članovima stalnih i povremenih radnih tijela Općinskog vijeća Ilijaš. Znači, na isti način će biti tretirana kao i rad u stalnim radnim tijelima Općinskog vijeća. Prema sjednici Zdravstvenog savjeta i učešća u radu prisustvo sjednici je 50,00 KM.

Diskutanata po ovoj tački dnevnog reda više nije bilo, pa je OV-e jednoglasno donijelo

Odluku o osnivanju Zdravstvenog savjeta na području općine Ilijaš

AD-7

Prijedlog Odluke o izmjenama i dopunama Odluke o osnivanju mjesnih zajednica na području općine Ilijaš

SANJA ZAGORAC-JOZIĆ – pomoćnica načelnika

Odluke o izmjenama i dopunama Odluke o osnivanju mjesnih zajednica na području općine Ilijaš, radi se praktično radi o intenciji predlagača da statutarni član 85. stav 2. koji kaže da broj članova Savjeta mjesnih zajednica ne može biti manji od pet, a ni veći od devet. Znači, za provođenje ovih izbora koji nam predstoje, predlagač je cijenio, na osnovu dosadašnjeg iskustva i rada dosadašnjih Savjeta da se svaki Savjet MZ-e koji je brojao više od pet članova, praktično nije bio efektivan na tom svom lokalnom području, da je bilo problema s obezbjeđenjem kvoruma za održavanje sjednica Savjeta i onda je stav

predlagača da Savjeti mjesnih zajednica, njih četrnaest, broje po pet članova. Osvrnut ću se i na stav Komisije za statut i propise i njihove primjedbe su bile kao i u prethodnoj Odluci da nije ispravno citiran broj Službenih novina Kantona Sarajevo u kome su objavljene izmjene i dopune Poslovnika o radu OV-a i takođe ova tehnička greška da prvo ide brojčana, a onda slovna oznaka za broj članova.

ALMIR ŠPIODIĆ – vijećnik BPS-Sefer Halilović

Što se tiče ove Odluke, opravdano je smanjenje broja članova Savjeta u određenoj mjeri. Ako imamo pet aktivnih ljudi to je bolje, nego imati deset i više neaktivnih. To je sa jedne strane opravdano i to smo mi tražili, kao predsjednici Savjeta mjesnih zajednica, gdje smo u mandatu od dvije godine nikada se nas devet nije skupilo, nego tu uvijek bude pet ili šest ljudi. S druge strane, možda i nije loše da ostane stari broj članova, jer se desi da neko ne može doći na sjednicu Savjeta i ne znam kako će se sada ovdje održati kvorum ako tri čovjeka održe sjednicu Savjeta MZ-e, imaju kvorum, i upravljaju mjesnom zajednicom od pet do šest hiljada stanovnika. Možda ne bi bilo loše da ostane Odluka od devet članova, odnosno po broju stanovnika. Za neke mjesne zajednice je ovo prihvatljivo, ali za one malo veće mislim da bi trebalo proširiti broj članova Savjeta.

Diskutanata po ovoj tački dnevnog reda više nije bilo, pa je OV-e većinom glasova donijelo

Odluku o izmjenama i dopunama Odluke o osnivanju mjesnih zajednica na području
općine Ilijaš

AD-8

Prijedlog Odluke o uslovima, načinu kandidiranja, održavanju izbora, dodjeli mandata u mjesnim zajednicama i razrješenju predsjednika i članova Savjeta mjesnih zajednica

SANJA ZAGORAC-JOZIĆ – pomoćnica načelnika

Podsjetit ću vas da smo prije godinu dana donijeli Odluku o produženju mandata predsjednicima Savjeta mjesnih zajednica i da smo ostali u obavezi da u 2019. godini provedemo izbore nakon donošenja Odluke o uslovima, načinu kandidiranja, održavanju izbora, dodjeli mandata u mjesnim zajednicama i razrješenju predsjednika i članova Savjeta mjesnih zajednica. Mislim da je predlagač napravio jedan dobar prijedlog, ali evo tu smo da kažemo sve svoje primjedbe. Decidno su definisane stvari, a možda je neki modalitet izmjenjen, ali vjerujte da ovo nije samovolja ni pojedinca ni službe. Ovaj modalitet je proizašao kroz sami projekat jačanja i uloga mjesnih zajednica. Mi smo ovaj prijedlog analizirali i sa predstavnicima UNDP-a, zatim njihovim preporukama, prijedlozima dobrih praksi, a Almir Špiodić bi to trebao znati. Cilj nam je bio da dođemo do funkcionalnih Savjeta mjesnih zajednica i zato je ovakav prijedlog da se predlaže tim. Znači "ja kao predsjednik Savjeta predlažem još četiri čovjeka na koje mogu da računam, da znam da će prisustvovati sjednicama, da će uzeti aktivno učešće u radu Savjeta". Mislim da se ovo rješenje ne sukobljava ni sa jednim onim što se kod utvrđivanja dnevnog reda navedeni. Posebno se moram osvrnuti na stav Komisije za statut i propise i reći da mi, kao predlagači, prihvatamo sve ove prijedloge koji su navedeni u njihovom izvještaju.

MUHAMED HANDŽIĆ – vijećnik BPS-Sefer Halilović

Kao što reče pomoćnica načelnika, urađena je jedna kvalitetna i temeljita Odluka za

predstojeće izbore za predsjednika i članove Savjeta mjesnih zajednica. Ja imam niz pitanja, ali krenut ću redom. U članu 4. ste napisali da će se izbori vršiti na jednom biračkom mjestu.

Pitanje za vas glasi: Kako mislite provesti izbore u Ilijašu i da dođe narod iz Kadarića, pa da glasa na jednom biračkom mjestu? Kako mislite da dođe narod iz Bioče i da glasa u Luci? Oni su udaljeni 8 km i mislite li da im to imponuje da dođu u Luku da glasaju za predsjednika i članove Savjeta mjesne zajednice.

Dalje, način kandidiranja – maloprije ste rekli, predsjednik Savjeta mjesne zajednica bira tim. To je ispolitizirano do kraja. Znači, Odluka je potpuno ispolitizirana. Pokušava se provesti trenutna nadmoć nekih političkih subjekata. Imate izuzetno jake aspiracije i prema mjesnim zajednicama, iako ste do sada radili na izborima samo kao strački faktori. Dakle, kandidat za predsjednika Savjeta mjesne zajednice ste naveli da će biti pod brojem jedan, a svi ostali brojevi će biti kao članovi. Sada vas pitam, ako član Savjeta mjesne zajednice pod brojem 3. dobije veći broj glasova, ovo je hipotetički, od kandidata za predsjednika Savjeta mjesne zajednice, on znači neće biti predsjednik Savjeta mjesne zajednice, nego će biti ovaj što je pod brojem jedan, a dobio je manje glasova.

Dalje, napisali ste da je nespojiva funkcija predsjednika i članova savjeta Mjesnih zajednica sa funkcijom vijećnika u Općinskom vijeću Ilijaš. Ovo je u suprotnosti sa Izbornim zakonom definitivno. Svako može da bude biran i izabran. Ona Odluka koja je bila prije ove, da poslije mora podnijeti ostavku na neku od funkcija, donekle i ima smisla. Ova nema nikakvog smisla iz razloga koji sam ja objasnio u svojim pitanjima i inicijativama. Većina nas smo bili kandidati na proteklim općim izborima za veći nivo vlasti i nismo morali podnijeti ostavke na funkciju općinskog vijećnika. Sada, ako sam kandidat za predsjednika ili člana Savjeta MZ-a morao bih podnijeti ostavku na funkciju vijećnika. To je obrazloženje što je u suprotnosti sa Izbornim zakonom. Također je u suprotnosti sa Zakonom o ljudskim pravima, jer se i tamo kaže da svako može biti biran i izabran. Na kraju, sa principima Zakona o lokalnoj samoupravi Federacije BiH, ovo se nigdje ne pominje da vijećnik ne može biti kandidat za predsjednika ili člana Savjeta MZ-e.

Vi ste, kao što ste i navikli, predložili ovo pod patronatom i zahtjevima određenih moćnika i došlo je sada nama na sto da mi to usvojimo. Međutim, ovo usvojite vi i imat ćete posljedice vjerujte.

Dalje, ovdje ste napisali potpise građana da mogu kandidovati svoje grupe. Ovo najgori mogući termin koji je mogao doći pred ove izbore Savjeta MZ-a.

Dalje, Općinska izborna komisija nije definisala u ovome, a vi ste rekli da će naknadno definisati uslove izbora, pravilima itd. Nije definisala mnoge stvari koje je trebala definisati ovim pravilnikom.

Ovom Odlukom nije definisan ni paušal predsjednicima Savjeta, odnosno članovima Savjeta MZ-a.

Sada, neću ništa predlagati, jer se upotpunosti ne slažem sa ovom Odlukom, a i moji prijedlozi se neće uvažiti ma koliko oni bili konstruktivni i ispravni. Vi ćete vjerovatno donijeti ovu Odluku, vi ćete provesti izbore, vjerovatno ćete pokušati da izaberete one koji vama odgovaraju, kao Savjete MZ-a, ali ćete morati snositi i konsekvence u nekom narednom periodu.

ALAN ŠERAK – vijećnik SDP-a

Pročitao sam Odluku i sjećam se da je ovo svojevremeno bivši predsjedavajući Damir Filipović predlagao nakon što je obišao sve mjesne zajednice iz razloga što su se vidjele sve manjkavosti bivšeg načina biranja Savjeta MZ-a, jer svi hoće da su predsjednici Savjeta i kada ne prođu, onda neće da učestvuju u radu Savjeta MZ-e. S jedne strane

razumijem ovo da idemo na način zatvorenih listi i da svako glasa za jednu listu i da budući predsjednik bira sebi saradnike. Međutim, ima ovdje određenih manjkavosti, a tiče se same Odluke. Naime, mene zanima glasanje u odsustvu, jer imamo ljudi koji su sa adresom u Ilijašu, ali pola kalendarske godine borave van države. Imate taj primjer u MZ Mrakovo, MZ Ljubnići, MZ Podlugovi, MZ Ljubina itd. Da li postoji mogućnost da i ti ljudi uzmu aktivno učešće i da biraju budući Savjet MZ-a imajući u vidu da će većinu svog vremena boraviti ovdje. Dakle, to nismo predvidjeli. Mislim da ovaj procent od 50% listića koji će se šampati, treba povećati iz razloga, dat ću vam primjer Ljubine gdje će izlaznost biti veća od 50%. Ovo pogotovo govorim za manje mjesne zajednice. Razumijem da se su većim mjesnim zajednicama ovaj broj neće ni ispuniti, ali vjerujte u manjim mjesnim zajednicama će izlaznost biti itekako veća. To ste morali predvidjeti.

Treća stvar koja me uistinu zanima jeste naknada za rad budućih predsjednika i članova Savjeta MZ-a. Da li će doći do korekcije postojeće Odluke imajući u vidu da ste ovdje naveli da ovaj način izbora neće imati nikakve implikacije na sam Budžet, a znate da smo usvojili Budžet i predvidjeli sredstva za rad Savjeta MZ-a koja su, čini mi se, ostala na prošlogodišnjem nivou. Znači, zanima me da li će se u budućnosti pristupiti izmjeni Odluke i kolika bi naknada trebala da bude i ko bi sve trebao da dobije tu naknadu za svoj rad.

ALMIR ŠPIODIĆ – vijećnik BPS-Sefer Halilović

Jedna kineska poslovice kaže "Ne brine me što štetočina hoće da uništi svijet, već me brine ćutanje ćestitih i pametnih ljudi". Mi smo, ćini mi se, danas u slićnoj situaciji. Ne brine mene ova Odluka, nego što sam siguran da ovdje u ovoj sali ima vijećnika koji se slažu sa mišljenjem i kolege Handžića i Šeraka i sigurni su i oni da je ova Odluka nezakonita i da ovakvu Odluku, kada bi se oni sami pitali, po svojoj pameti ne bi ni donijeli. Ja ovo ne bi ni nazvao Odlukom, jer meni više lići na javni poziv ili konkurs za izbor predsjednika i ćlanove Savjeta MZ-a, nego li demokratski izbor zagaranťovan Ustavom i Ustavnim zakonom zasnovan na principima ljudskih prava da svako mođe biti biran i da mođe birati svoje predstavnike u mjesnoj zajednici. Vi ovom Odlukom, kao što su kolege govorile, a osvrnut ću se na izbor, odnosno naćin ko se mođe kandidovati za predsjednika ili ćlana MZ-e. Znaći, vi ste uslovili ko mođe biti kandidat, odnosno ko ne mođe. Što znaći, sve što nije definisano Odlukom, mođe da bude kandidat. Rekli ste da je nespojiva funkcija vijećnika sa ćlanom Savjeta ili sa predsjednikom Savjeta MZ-e. Nespojivost sa predsjednikom mođe se i nekako prihvatiti, ali kakve veza ima sa ćlanom Savjeta ako ćovjek hoće da radi volonterski u svojoj mjesnoj zajednici. Ne znam po ćijoj se pameti takva rećenica ubacila. Oćigledno je ko je nju ubacio i oćigledno je zbog koga se ona ubacuje. Ja želim predlagaću da postavim nekoliko konkrećnih pitanja i kao što predlagać reće da su decidno definisane sve taćke, pa da mi se onda decidno i odgovori.

Prvo pitanje - mođe li predsjednik Komisije za mjesne zajednice biti i predsjednik Savjeta MZ-a? Je li to po vama spojiva funkcija sa predsjednikom ćlana savjeta MZ-e? Je li spojiva funkcija uposlenika općine i predsjednika Savjeta MZ-a ili ćlanom Savjeta? Je li spojiva funkcija vijećnika i predsjednika udruženja, pa sam sebi glasa za Budžet? Ukoliko doće do napušćanja nekog od ćlanova Savjeta iz bilo kojeg razloga, kako mislite da se ćetiri ćovjeka dogovore ko će biti predsjednik Savjeta i kako će peti ćlan ući u Savjet da bi mogli ravnomjerno odlućivati? Da li to pretpostavljamo da će se tih ćetiri ćlana dogovoriti koga će postaviti za predsjednika ili to treba definisati jasno? Sve što nije definisano ovom Odlukom, ostavlja prostor za manipulacije. Doće glasanje, fali jedan ćlan Savjeta, a vi ste tamo napisali da oni, a ne graćani, sebi biraju petog ćlana. Šta ako se desi da glasanje bude 2:2? Šta ćemo tada poduzeti? Jeste li to predvidjeli? Hoću jasan, taćan i decidan odgovor.

Dalje, peto pitanje: Na osnovu kojih indikatora ste došli do zaključka da je nespojiva funkcija predsjednika ili člana Savjeta MZ-e sa funkcijom vijećnika? Molim vas decidne indikatore, parametre po kojima ste donijeli takav zaključak da je to tako.

Molim vas, citirajte mi decidno Zakon u kojem imate uporište da vijećnik ne može biti kandidat na neku drugu funkciju za koju ga biraju građani dok ne podnese ostavku na poziciju vijećnika.

Kada mi odgovorite na moja pitanja decidno, imate moje obje ruke da usvojite ovu Odluku, ali ne političke odgovore. Znamo mi da ovo politika kreira. Nije ovo samo iz Službe za društvene djelatnosti došlo. Da je Služba ovo radila, ona bi ovo uradila bolje. Da je Služba radila zajedno sa predsjednicima Savjeta MZ-a, jer kao što je najavio gospodin Dević na jednoj od sjednica Vijeća, mi smo imali godinu dana da ispravimo te propuste koje smo imali, a znamo kakve smo imali kada je izabran novi saziv Vijeća. Rečeno je da to ostavimo, a uzet je izgovor projekat UNDP-a. Pa ja sam bio član Savjeta MZ-e i vijećnik i potpisali smo tamo da ćemo svi mi do 2019. godine biti volonterski koordinatori na projektima jačanja uloge mjesnih zajednica. Ne moramo biti ni članovi Savjeta. Možemo angažovati bilo koga iz MZ-a da bude koordinator na projektu. Taj projekat je samo bio izgovor da se produži to nešto, jer nije bila spremna Odluka kakva treba. Onda ste godinu dana propustili da napravite Statute mjesnih zajednica i da napravite jednu kvalitetnu Odluku u konsultaciji sa svim relevantnim ljudima koji mogu dati dobre prijedloge. Ja nisam imao namjeru da se više kandidujem. Ja sam mjesnu zajednicu, slobodno mogu reći, apsolvirao. Građanski aktivizam, projekte sam apsolvirao. To pokazuju rezultati od 2014.-2017. godine u Podlugovima i nemam potrebu vraćati se na to. I dalje ću kao volonter raditi za svoju mjesnu zajednicu i ne moram biti ni član Savjeta. I za općinu Ilijaš i sve druge mjesne zajednice ću dati svoj doprinos, jer jednostavno sam takav. Znači, niste morali ovu Odluku mjenjati zbog mene, ako ste je zbog mene mjenjali. Ovaj egoizam da se kontroliše sve, a da se ne vraćam sad na zapošljavanje, da se kontroliše i član Savjeta u mjesnoj zajednici, koštati će vas kao što je koštao Visoko, Zenicu, Kalesiju i druge gradove. Vjerujte, ugušiti ćete se u ovom egoizmu da se kontroliše svaki čovjek koji je na bilo kojoj poziciji, od udruženja do predsjednika i člana mjesne zajednice. Siguran sam da ovakva Odluka u cjelosti nije došla iz Službe za društvene djelatnosti.

Molim vas odgovorite mi na pitanja, a ja ću vam ponovo pitanje po pitanje postaviti tako da ne morate pisati.

BESIM GLJIVA – samostalni vijećnik

Napokon da se krenuli s mrtve tačke da se nešto i uradi po pitanju izbora u mjesnim zajednicama. Dugo godina, iz ličnog iskustva i kao vijećnik, znam da su uvijek bili problemi vezani za izbor u mjesnim zajednicama i za sami rad nakon izbora u mjesnim zajednicama. Ova Odluka, a govorim na bazi iskustva u lokalnoj zajednici, ima dosta dobrih stvari (smanjenje sa devet na pet članova, vjerovano će biti aktivniji u radu). Da ne ponavljam prethodnike, u nekoj sam dilemi. Nosilac liste od tih pet članova je automatizmom predsjednik Savjeta MZ-e. Znači, on može imati nula glasova, a bilo ko sa njegove liste može imati maksimalan broj glasova, ali on ostaje samo član Savjeta. To je za jednu veliku dilemu. Ako vi želite kreirati mjesne zajednice na neki drugi način, bilo politički ili neki drugi, onda je to dobro i to pozdravljam ako je tako. Za mene je zvaničan predlagatelj Služba koja je ovo predložila, a mi svi otprilike imamo pravo da mislimo i znamo ko je u suštini predlagatelj i kako se to predlaže i zbog čega se predlaže. Činjenica je da ovdje svako ko se udubio i ko ima iskustva ili je radio u mjesnim zajednicama ili ko sjedi ovdje u Vijeću, on može prepoznati neke stvari kroz ove članove i tačke Odluke da su neke stavke donesene u cilju diskreditacije i pojedinih članova kako bi ih eliminisali iz te utrke,

kako reče kolega Špiodić. Međutim, ne bitno. Ne znam čime se rukovalo, ovo što sam našao na stolu što je Komisija kao nešto ispravila. Ta neka famozna komisija. Ne potcjenjujem, ali sve više mi ta Komisija liči na famoznu komisiju, iz godine u godinu. Ne znam čime su se ljudi rukovali kada kažu da je nespojiva funkcija člana i predsjednika Savjeta MZ-a sa uposlenicima Službe za društvene djelatnosti i poslove mjesnih zajednica. Čuj, baš samo ove Službe. Ako se rukovodio predlagatelj uštedom u Budžetu, pa kaže da vijećnik ne može biti predsjednik MZ-a da ne bi paralelno povlačio sredstva iz Budžeta, na bazi uštede, to pozdravljam. Kako je onda moguće da možemo kandidirati uposlenika općine koji prima platu iz tog organa, primat će naknadu za rad u Savjetu, ako bude izabran i normalno u mogućnosti je da mnoge stvari kanališe na neki način koji možda nije ni po Zakonu.

Da ponovim. Pozdravljam da se nešto treba promijeniti i većina ove Odluke u nekom dijelu je prvi korak i dobro je. Međutim, određene stvari u ovoj Odluci su očigledno išle skroz u nekom drugom pravcu. Međutim, mislim da je i to "pucanj u prazno". Ovo će se u neko skorije vrijeme, kako reče neki kolega, obiti mnogim nama i vama o glavu.

Izbjegavam da to pominjem i poštujem sve svoje kolege vijećnike, ali čudi me da nekada ne uzmu učešće u diskusiji o nečemu što bi doprinijelo jednom kvalitetnom dokumentu, jer znam da oni to znaju, jer su obrazovani i pametni ljudi. Da prećutno ne čute na neke stvari koje su očita jedna manipulacija, pa ako hoćete i politička zbog određenih političkih ciljeva iako je to sve dozvoljeno. Politika se bori na terenu, svaka politika da bude dominantna, ali ja sam čovjek koji to ne bi radio po svaku cijenu.

Moje konkretno pitanje je čime se rukovodio predlagatelj? Da li da spriječi paralelno primanje naknade iz Budžeta po dva osnova, kao predsjednik ili član Savjeta i zašto nije definisano da ni uposlenik organa općine ne može biti član Savjeta ili predsjednik, ne znam ko će primati naknadu. Vjerovano će se u neko skorije vrijeme definisati da i svi članovi Savjeta primaju naknadu. To je jedno od mojih konkretnih pitanja. Ovo drugo pitanje koje sam imao, rekao je kolega Špiodić, a to je kako, u slučaju napuštanja Savjeta iz raznoraznih razloga, imenovati novog predsjednika.

MIRSAD OSMANOVIĆ – vijećnik SDP-a

Evo već nekoliko sjednica Vijeća izbjegavam da govorim baš iz razloga što ste gospodo u zadnje 3-4 sjednice Vijeća uveli kao pravilo kršenje Pravilnika, Poslovnika, Statuta, Ustava Federacije i Kantona. Meni je žao što je veliko breme stavljeno na predsjedavajuću OV-a i dopredsjedavajućeg OV-a. Ovo što je Špiodić rekao, da ne obrazlažem. Evo imamo pravnik ovdje. Gospodine Špiodiću, ono što nema u Odluci, regulisano je višim aktom – Ustav, Statut općine Ilijaš, a ako nije regulisano Odlukom, a Statut govori nešto drugo. Maksumu je jasno da su u koliziji ova Odluka, jer se poziva u preambuli na Statut. Ja bih vas zamolio, mada razmišljam mjesecima, treba dvadeset pravnika da riješi ovo gdje smo mi ušli u ovo "blato", da vratimo rad Vijeća u zakonske okvire. Ako hoćete ja ću vam definisati. Vi se pozivate na izvještaj Komisije za statut i propise i to koristite kada vam odgovara. Maksumu je jasno da je u koliziji Statut i ova Odluka. Kolega Špiodić je fantastično objasnio. Ne moraju biti regulisane neke stvari ovom Odlukom, da ne ponavljam, ali treba da se pozovemo na veći akt. Ako se pozovemo na veći akt oni su u suprotnosti. Molim vas, dajte snagom argumenata da ovo riješimo. Ja vas molim, ne samo ovo Vijeće, nego i službe općine, dajte da vratimo ovo Vijeće u zakonske okvire. Imamo Poslovnik koji nismo donijeli, objavljen, ali ja ne znam kako se ovdje ponašati kao vijećnik, a da ne nabrajam dalje. Ovdje nije u pitanju neznanje i ne znam zašto ovo radite. Nije u pitanju samo ova Odluka. Jednostavno imate dovoljan broj ruku, uradite u skladu sa Zakonom, sa svim propisima koji su na snazi i da završimo i neće biti ni Handžića i ja mu

čestitam i vi bi ih trebali častiti i Špiodića i Alana. To su ljudi koji nastoje kanalisati određene stvari, a ne da su protiv nečega. Mi smo se zakleli da ćemo raditi u skladu sa Poslovnikom, Statutom, Ustavom. Nemojmo da smo djeca. Da imate potrebu da radite ovo što radite zadnje četiri sjednice Vijeća, nemate ama baš nikakvu potrebu. Dajte da sjedemo i razgovaramo. Ja sam se 3-4 godine nudio da pomognem oko Statuta MZ-a, evo i Meša zna. Činjenica je da trebaju promjene u Pravilniku, ali nemojte da pravimo nešto lošije nego što jeste i još da kršimo akt koji je za nas svetinja.

MUHAMED HANDŽIĆ – vijećnik BPS-Sefer Halilović (replika)

Kao što je Mirsad rekao da je Statut Ustav općine i treba da ga poštujemo i tome smo se i zakleli i evo mi ga nismo promjenili, ali smo donijeli Odluku koja će morati promijeniti Statut. E sada, je li starija Odluka ili Statut, pitam vas? Po meni, Statut je stariji. Mi smo trebali prije promijeniti Statut i njegov član 86, i posebno član 88., pa onda pristupiti donošenju Odluke na osnovu ovog Statuta. Ako hoćete ja ću pročitati o čemu se radi, a može i sekretar, u članu 86. fino piše da Savjet mjesne zajednice biraju građani koji žive na području mjesne zajednice, neposrednim i tajnim glasanjem, da je predsjednik osoba koja dobije najveći broj glasova, da su članovi Savjeta mjesne zajednice osobe koje dobiju sljedeći broj glasova.

Vi ovom Odlukom izbjegavate zborove građana i namećete im svoju volju. Ovdje ste naveli da političke partije, grupe građana, udruženja mogu predlagati kandidate za predsjednika i članove Savjeta MZ-e. Ljudi moji, ne trebate to raditi. Nemojte ovu Odluku donositi, jer je u suprotnosti sa Statutom općine, a posebno u suprotnosti sa principima Zakona o lokalnoj samoupravi. Razumni ste, cijenim posebno načelnika i on je čovjek koji je najduže tu od svih nas i molim da utiče na vas, jer vi ste mladi ljudi, ali izgleda da radite po diktaturi i po instrukcijama, a ne po vašim razmišljanjima i procjenama. Vodite računa, jer krišite Zakon i neću više ponavljati.

ALMIR ŠPIODIĆ – vijećnik BPS-Sefer Halilović (replika)

Dok kolega Handžić govori, neki gledaju u telefon, neki čitaju novine, totalno nezainteresovano i sve što on govori da piše u Statutu općine stiže se dojam da on ovo izmišlja iz svoje glave. S tim u vezi, zamolio bih sekretara OV-a da nam pročita član 86. Statuta općine Ilijaš. Mislím da će onda vama kolege vjerovati, jer nekako mi s nevjericom gledate dok kolega Handžić iznosi ono što piše u Statutu. Znači, pročitajte nam član 86. i 88. Statuta općine Ilijaš.

ILDA KAHRIMAN – sekretar OV-a

Član 86. Statuta općine Ilijaš glasi:

"Savjet mjesne zajednice biraju građani koji žive na području mjesne zajednice, neposrednim i tajnim glasanjem.

U savjet mjesne zajednice izabrani su kandidati koji dobiju najveći broj važećih glasova birača koji glasaju.

Izbori u mjesnim zajednicama održavaju se prve subote u aprilu, osim ako se ovaj datum podudara sa obilježavanjem jednog od vjerskih praznika, pri čemu se održavanje izbora pomjera za prvu subotu u kojoj se ne obilježava ni jedan od vjerskih praznika.

Uslovi, način kandidiranja i odražavanja, kao i raspisivanje prvih narednih izbora utvrdit će se posebnim odlukama općinskog vijeća.

Mandat članova savjeta mjesne zajednice traje četiri godine.

Ukoliko prestane mandat člana savjeta zbog ostavke ili nekog drugog razloga, popuna se vrši sa liste kandidata koji su dobili najveći broj glasova na izborima".

Član 88. glasi:

"Predsjednik savjeta mjesne zajednice je kandidat koji dobije najviši broj glasova za izbor u savjet mjesne zajednice, čiji mandat je vezan za mandat savjeta mjesne zajednice i traje četiri godine, a ukoliko taj kandidat ne prihvati mandat, predsjednik je naredni kandidat koji je osvojio najveći broj glasova.

Ovaj princip se primjenjuje sve dok se ne dodijeli mandat predsjednika savjeta mjesne zajednice.

Ukoliko prestane mandat predsjednika savjeta zbog podnesene ostavke ili bude razriješen dužnosti u skladu sa članom 94. ovog Statuta, dužnost predsjednika savjeta preuzima naredni kandidat koji je osvojio najveći broj glasova na izborima i njegov mandat traje do isteka mandata savjeta".

MUHAMED HANDŽIĆ – vijećnik BPS-Sefer Halilović (replika)

Hoće li se ovom Odlukom poštovati član 86. i 88. Statuta općine Ilijaš? Naravno da neće.

AKIF FAZLIĆ – općinski načelnik

U kreiranju ove Odluke mi smo je pozicionirali na osnovu nekog mog ličnog stava i mišljenja da je ovo Vijeće i sve lokalne politike identificirale dvije stvari, a to ne funkcionisanje Savjeta MZ-a zbog načina izbora Savjeta MZ-a i drugi stav da je nespojiva funkcija općinskog vijećnika i predsjednika ili člana Savjeta MZ-e. Ta dva stava su ugrađena u ovu Odluku. Možemo se vratiti unazad 2-3 godine i po zapisnicima vidjeti da je većina nas diskutovala kada su u pitanju ove teme bile baš usmjerene na funkcionisanje Savjeta MZ-a zbog načina izbora Savjeta, a to je utrka za predsjednika i oni koji izgube, nema ih više i predsjednik ostaje sam. Dalje, nespojivost člana Općinskog vijeća, odnosno vijećnika što ja lično podržavam, jer se radi o izabranim zvaničnicima. Ovdje moramo odvojiti ljude koji imaju radno-pravni status proistekao u Zakonu o radu i to je skroz druga situacija. Ljudi, ovdje se radi o izabranim zvaničnicima. Na osnovu tih postulata kreiran je prijedlog Odluke. Zaista je kreiran na bazi dosta pregledanih Odluka po drugim općinama, po ovom i onom. Je li najbolji model da riješimo ova pitanja, evo vi ćete dati procjenu i izjasnit ćete se kod usvajanja ove Odluke. Sljedeće jeste pitanje samog procesa izbora u tehničkom smislu. Dakle, broj biračkih mjesta, broj listića, glasanje u odsustvu, mi smo nastojali da to što više pojednostavimo. Ostavljamo građanima da iskažu interes za svoju mjesnu zajednicu i da taj interes pokažu na dan izbora. Pitanje glasanja u odsustvu nije tretirni niti mislim da je općina u poziciji da može tretirati pitanje glasanja u odsustvu. Broj biračkih listića rekli smo 50% i razumijem prijedlog koji je gospodin Šerak rekao, ali smo ugradili u Odluku da birački odbor u toj mjesnoj zajednici, ako procjeni da ima potrebu za većim brojem glasačkih listića, može u toku biračkog dana tražiti od Općinske izborne komisije da se isprinta dodatno 20% glasačkih listića, što znači da bi imali 70% listića za tu mjesnu zajednicu.

Izbori u mjesnim zajednicama nisu definisani nikakvim višim Zakonima. To je ovlaštenje ovog Vijeća i ove lokalne zajednice, naravno i da poštujemo Zakone koji imaju nekog uticaja, ali, pravila, modele, modalitete, načine, svoja opredjeljenja ostaju u ovom Vijeću i nemojte da se sada kačimo nešto je rekao državni Izborni zakon i ne znam imali još koji Izborni zakon. Dakle, ti Izborni zakoni nemaju refleksiju u nekom smislu da mogu

opredjeljivati nas u Odlukama kako želimo provesti ove izbore.

Probat ću ovih nekoliko odgovora dati, a neke možda nisam uspio evidentirati.

Pitanje predsjednika Savjeta, čini mi se da niste dobro izanalizirali, kao može se desiti da dobije nula glasova. Ne, ovdje smo se opredjelili da se ne glasa za pojedinca, nego se glasa za liste. Dakle, lista koja dobije najveći broj glasova znači da svi unutar te liste imaju isti broj glasova. Lista koja bude imala najviše glasova npr. Lista 1. - 500 glasova, Lista 2-400 glasova. Pobjedila je Lista br.1 i ti ljudi unutar te liste su praktično dobili svi po 500 glasova. Predsjednik je broj 1. na listi. Zamjenik predsjednika, ovdje smo definisali, ako on ode, nema toga da se unutar liste članovi svađaju, nego je onaj na rednom broju 2. koji je pozicioniran. Sljedeće, ako dođe do odsustva nekog od članova Savjeta, dakle ne bira njih Savjet, nego Savjet predlaže da li direktno ili preko Službe, ali mislim da preko Službe predlaže Općinskom vijeću i Općinsko vijeće donosi Odluku o popunjavanju Savjeta mjesne zajednice sa tim članom koji je u međuvremenu iz raznoraznih razloga izgubio poziciju člana Savjeta. Dakle, ovdje smo mi predložili, i predsjednik i članove Savjete, prije svega, ne zbog finansijskih razloga, to isto se može ako logički sve povežemo, uticaj vijećnika i člana Savjeta u Podlugovima ili u Lješevu, je jednostavno obrazloživ da taj vijećnik kroz taj vid može preferirati i uticati ka svom Savjetu ili ka svojoj mjesnoj zajednici. Ovaj model u potpunosti ispunjava ono što piše u članu 86. i 88. Statuta općine Ilijaš. Dakle, on obezbjeđuje da građani biraju tako što će se organizovati u grupe građana, u zborove građana, u forume građana, političke stranke, udruženja i kandidirati i praviti liste i biće izabrani oni koji su dobili najviše glasova ovim metodom. Dakle i time se zadovoljava i član 86. i 88.. Naravno, ovo u članu 86. gdje piše da su izbori u aprilu, donijeli smo Odluku prošle godine i kazali da toga nema. Obaveze Općinske izborne komisije nastupaju tek kada ova Odluka stupi na snagu, a stupit će na snagu ako se donese, objavom u Službenim glasilima Kantona Sarajevo i onda Općinska izborna komisija kreće sa svojim ovlaštenjima koja su joj dana ovom Odlukom. Pitanje gospodina Handžića i Šeraka vezano za naknade predsjednika i članova Savjeta – ja sam dugo razmišljao o tome i opredjelio se da to ne bude u sklopu ove Odluke, a želio sam da ova Odluka bude sveobuhvatna, integralna od onoga kako doći, postati, razriješiti. Znači, sveobuhvatan proces, pa je bilo nekog razmišljanja da tu budu i naknade i članovima. Međutim, naknade se mogu mijenjati i to kao što smo posebnom Odlukom regulisali naknade članovima Općinskog vijeća, regulisat ćemo posebnom Odlukom i naknade članovima Savjeta. Ja uzimam obavezno da možda za junsku sjednicu Vijeća, predložim dokument kada su u pitanju naknade predsjednicima i članovima Savjeta. Dakle, moja prva intencija je da svi dobiju naknadu. Naravno, tu naknada definisat ćemo zajedno. Predsjednik je do sada imao naknadu na nivou naknade vijećnika, ali moramo znati da predsjednici Savjeta kroz tu naknadu su zapravo alimentirali svoje materijalne troškove (telefoni, gorivo, dolasci, itd.) i to im nije baš bila naknada za rad. Slažem se da tu naknadu trebamo izdefinisati i to ćemo izdefinisati posebnom Odlukom. Iako ovdje nije naglašeno, može se staviti da će se naknade predsjednicima i članovima Savjeta definisati posebnom Odlukom.

Kada je u pitanju ovo što je vijećnik Špiodić govorio, čini mi se da sam već odgovorio na neka pitanja. Dakle, spojivost funkcija, ovdje kaže radno-pravni status i izabrani zvaničnici, to su potpuno dva odvojena svijeta i mislim da kada su u pitanju izabrani zvaničnici, da je dobro što ne mogu biti i u Vijeću i Savjetu mjesne zajednice.

Radno-pravni status – lično sam spreman i nemam ništa protiv da se kaže da u organu uprave, ali to je već zalaženje u kršenje nekih ljudskih prava. Oni imaju radno-pravni status i nemaju veze sa pitanjem i ovlaštenjima izabranih zvaničnika. Ovdje je Komisija za statut i propise predložila uposlenike Službe zato što oni imaju jaku poziciju koja im je u ovom prijedlogu Odluke dana. Dakle, da prate rad, da pripremaju izvještaje, da na na bazi tih izvještaja predlažu Općinskom vijeću, od usvanja do onog gdje će trebati razrješavati

Savjete. Eto tu se tražila neka vrsta nespojivosti i ja sam je u osnovi prihvatio. Almire, ovdje sam ti rekao, predsjednik je čovjek koji je na broju 2. i tako je definisano Odlukom. Isto sam ti rekao da oni ne biraju, nego oni predlažu kandidata Općinskom vijeću. Pitanje kvoruma – to se uređuje Poslovníkom o radu. Zna se šta je kvorum. Ako Savjet ima pet članova, kvorum je tri člana i to je to. Mislim da sam kroz ovo što su uvaženi vijećnici Handžić, Špiodić, Šerak, Gljiva i još par vijećnika postavili, na neki način odgovorio. Evo, to je taj kontekst Odluke kako mi vidimo kada je u pitanju izborni proces i kada je u pitanju funkcionisanje Savjeta mjesnih zajednica.

ALMIR ŠPIODIĆ – vijećnik BPS-Sefer Halilović (replika)

Hvala načelnice na ovim odgovorima. Ja sam sada malo zbunjen. Prvo smo mislili da je Služba predlagatelj i tražili smo odgovore od predlagatelja, a vi ste nam dali poprilično konstruktivne ne potpune odgovore, ali evo. Dakle, donosimo Odluku kako bi unaprijedili rad Savjeta mjesnih zajednica. Nije pasivnost članova Savjeta mjesne zajednice, govorim vam iz iskustva. Neko ko je prošao 22 zakazane sjednice Savjeta. Znači, može se kad se hoće. Može se raditi. Nije pasivnost članova Savjeta zbog konkurentnosti ko će biti predsjednik, a ko neće. Istina, bilo je sastanaka Savjeta i druženja sa predsjednicima Savjeta koji su govorili da članovi Savjeta ne rade ništa. Nemaju nikakvu obavezu da rade, a birali su ih građani. Da bi čovjek došao sa kraja Sovrla u Podlugove na sastanak Savjeta MZ-e, on ima troškove. Znači nismo, vrlo jednostavno, da ne idemo u ovakvu Odluku, dosadašnjim članom 86. i 88. Statuta općine, da smo skratili broj članova i povećali naknadu, pa i smanjili naknadu predsjedniku, imali bi ekstra funkcionalne Savjete mjesne zajednica ako hoćemo funkcionalnu mjesnu zajednicu u smislu građana. To je vrlo važan segment. Došli su ljudi iz Švedske i prepoznali taj problem kod nas. Mi ga konzerviramo, umjesto da se otvaramo prema tome. Mi ga konzerviramo na grupice od pet članova. Možda ovi egoisti misle da svi moraju misliti kao jedan, ne moraju misliti. Nisu se svi samnom slagali, ali smo svi radili zajedno i to je dobro. To nas je činilo drugačijim. Znači, ovaj način i ova Odluka ne donosi se da bi se olakšalo građanima u mjesnoj zajednici, nego da bi se olakšalo politici u manipulisanju u mjesnim zajednicama. Ako hoćemo da unaprijedimo rad Savjeta, dajte članovima Savjeta naknadu. Smanjite predsjedniku naknadu. Ograničite ih, naveli ste ovdje, tri mjesca, pa da podnesu izvještaj i zapisnike sa sastanka. Šta je tu problem? Vi ste vidjeli najveći problem u mjesnoj zajednici što je neki vijećnik bio član Savjeta i što je radio i možda se politički izgradio i što su ljudi prepoznali njegov aktivizam. Tu ste vi vidjeli najveći problem, a niste vidjeli problem da uposlenik općine, na osnovu Odluke koju ste prije donosili, bude izabran za predsjednika Savjeta MZ-e i onda Mjesna zajednica ne radi, ne može. Ta djevojka je na poslu ovdje od 08:00-16:00h. Problema ima u mjesnoj zajednici, ali predsjednik nije tu, ne može da dođe, ne može da održi zbor građana u 12:00 h, jer radi u općini. Fizički je spriječen da dođe. To je problem. Znači, nismo izdefinisali do kraja. Navedeno je da članovi Savjeta ne mogu biti uposlenici Službe za društvene djelatnosti i poslove mjesnih zajednica, ali mogu geometri. Kada ja tražim geometra za put, da mi označi put, trebam čekati mjesec dana, a tamo gdje je geometar član Savjeta, odmah sutradan će izaći na lice mjesta njegov kolega. To je logično i ja bih tako uradio. Hajde da malo pričamo sa logičke strane. Ovdje kada kažete nespojivost funkcija, fokus je stavljen samo na predsjednika Savjeta i vijećnika. Samo te dvije funkcije su nespojive. Kada ovo spominjem govorim malo glasnije, ali nisam ljut, nisam nervozan, nego nekako se tako bolje inspirišem kad pričam.

MUHAMED HANDŽIĆ – vijećnik BPS-Sefer Halilović (poslovnička intervencija)

Poslovnička intervencija se odnosi na vas predsjedavajuća i zamjenika predsjedavajućeg. Ja vas molim, a vjerujte neću vas više opominjati, ako budete dali nama riječ, a tamo se dogovarate i ne slušate nas uopšte ili glavu pod sto saginjali, ja ću vas početi gađati ovim upravljačem. Dakle, usmjerite se na vijećnika, nemojte biti nekorektni kada mi vas uvažavamo. Ja sam pričao, a vi se tamo nešto dogovarate, pričate.

ALMA OMEROVIĆ – predsjedavajuća

Kolega, postoji Etička komisija, a vi nemate pravo ovdje nikoga gađati.

MUHAMED HANDŽIĆ – vijećnik BPS-Sefer Halilović (poslovnička intervencija)

Ma kakva Etička komisija. Da Etička komisija zasjeda, ti ne bi bila tu.

ALMA OMEROVIĆ – predsjedavajuća

Između ostalog, postoji i policija.

MUHAMED HANDŽIĆ – vijećnik BPS-Sefer Halilović

Što se tiče načelnika, ja ima više pitanja. Načelniče, ja sam uvijek vas cijenio kao velikog čovjeka ekonomistu, velikog rukovodioca. Međutim, sada ste vi postali veliki političar nakon ovog vašeg izlaganja i veliki branitelj aktuelne politike ovdje i vladajuće strukture. Dakle, tako je to čovjek nama objasnio da je zadovoljen član 86. i 88. Statuta općine da ste vi opet više njemu povjerovali nego meni, a i pročitani su ovi članovi. Zamalo ti i ja nisam povjerovao da nisam opet pročitao. Molim vas, nemojte braniti politiku. Desit će vam se čudne stvari ovdje. Ja pozivam kolege koji nisu dio vlasti da više ne dolazimo na Vijeće. Mi smo ovdje isto kao voštane figure. Pričamo, trošimo vrijeme, a na koga i zašto. Trošimo vrijeme da ukažemo na nezakovitosti, na radnje koje se provode, a ne bi trebalo i ne smiju se provoditi. Međutim, vi to upravno radite "imamo trinaest ruku i više, idemo u procese da mi radimo". Ma vi samo radite i nastavite tako. Ja pozivam kolege iz opozicije ili kako god hoćete, ne mora biti opozicija, nemojte više dolaziti na Vijeće do kraja mandata, nema potrebe. Idite da otvaramo oči narodu da vide šta ovi ljudi ovdje rade. Sada me ubjeđuje ovdje da ne krše Zakone. Nije prekršeno ništa. Djevojka radi u općini i ujedno je predsjednica Savjeta MZ i ona nije u sukobu interesa. To je spojiva funkcija. E sada bi neko i od pomoćnika mogao biti predsjednik Savjeta mjesne zajednice, ali nemojte slučajno ko drugi da bude i vidite da nam bude blizu da ga možemo usmjeravati. Nemojte to raditi ili radite, ali ja više ovdje dolaziti neću.

ALAN ŠERAK – vijećnik SDP-a (replika i krivi navod)

Kolega Handžiću nismo mi ovdje nikakve voštane figure. Mi smo ovdje, i ja i ti, i ova desna strana koja sjedi u ovom Vijeću, konstruktivna pa nazovi opozicija. Mi dajemo prijedloge u rješavanju nekih stvari kako bi to trebalo da bude. Nažalost da nas nema ili na sreću nečiju, ove se sjednice Vijeća ne bi ni održavale vjerovatno, već bi se to telefonskim putem rješavalo kako to načelnik vrlo vješto radi.

Načelnik mi nije odgovorio na pitanje glasanja u odsustvu. Slažeš se samnom da bi to kao nešto trebalo, ali nam nisi konkretno ponudio kako to riješiti.

Kolega Špodić (moram i njemu replicirati), odlično si detektovao sve što si rekao i potpisujem sve od A do Ž, od prve do zadnje rečenice. Ali, kolega Špodiću treba da znaš da su nam sljedeće godine Lokalni izbori. Moraš da znaš koja je snaga predsjednika Savjeta MZ-e, moraš da znaš koliko će se paketa iduće godine djeliti po mjesnim zajednicama, moraš da znaš koliko će se ljudi predložiti da dobiju ovih 100,00 KM po mjesnim zajednicama i sve što se radi, radi se s ciljem jačanja pozicije Stranke demokratske akcije i bolje startne osnove kako bi ista zauzela da bi što bolje prošla na Lokalnim izborima, i to moraš da znaš. Svedoci smo bili svo ovo vrijeme kako se to radi. Vijećnicima se ne dozvoljava naravno da im se ne bi ugrozio tamo neki glas u zavisnosti o kojoj mjesnoj zajednici se radi. Poželjno je da uposlenici organa uprave budu predsjednici Savjeta MZ-a iz razloga da ovdje primaju platu i da slušaju načelnika. To je poželjno i ja bih možda tako radio. Ako želite da kažete da je ovaj prijedlog Odluke transparentan, korektan, ispravan, nemojte to raditi. Ne možemo zabraniti vijećniku da se kandiduje, a dozvolit ćemo pomoćniku načelnika da se kandiduje. Ne razumijem. Je li zadirem u nekakva, kako ste vi rekli, ljudska prava. Pa zadirete ovdje u prava da neko bude biran i da bira. To je osnovno ljudsko pravo ljudi. Vi ovom Odlukom itekako kršite tu odredbu. Zamolit ću načelnika da nam ponudi konkretno rješenje, jer imamo dosta ljudi koji su prijavljeni u Ilijašu, a većinu vremena borave van države BiH. Ja smatram da oni treba uzmu učešće u biranju budućeg Savjeta MZ-a.

ALMIR ŠPIODIĆ – vijećnik BPS-Sefer Halilović (replika)

Hvala vam kolega koji mislite da je moja diskusija opravdana i da je ispravna. Drago mi je da neko razmišlja na jedan ispravan način, a ne na način kako mu politika nalaže. Meni je vrlo jasno šta znači predsjednik Savjeta MZ-e za politiku. Ja se ne stidim i mogu slobodno da kažem da sam ja u ovom ovdje Vijeću zahvaljujući poziciji predsjednika mjesne zajednice, jer sam imao priliku da radim na terenu i da se dokažem ljudima. Imao sam priliku da komuniciram sa ljudima i da zajedno rješavamo probleme. Da nisam bio u toj poziciji, dana sigurno ne bi sjedio ovdje u Vijeću. Zašto? Zato što nisam imao inženjering iza sebe koji bi mi donio glasove, nisam imao vremena ni duplih patika da hodam po selu od kuće do kuće i da tražim glasove, nisam imao Biračke odbore koji će duplati i nisam imao novca da platim plakate, bilborde, skupe reklame itd. Da nisam imao priliku biti predsjednika Savjeta MZ-e, raditi iskreno i pošteno u interesu građana, a oni su mi to vratili na najbolji način. Ovom prilikom se zahvaljujem građanima i ne moram ja, po vama, biti član Savjeta MZ-e, ni predsjednik Savjeta MZ-e, ali ću i dalje da nastavim da radim volonterski onako kako sam i do sada radio. Ono što sam zaboravio da kažem, a ponukao me je kolega Šerak, ja ću, samo da zvanično najavim, biti kandidat za Savjet mjesne zajednice i ako usvojite ovakvu nakaradnu Odluku. Znači, bit ću kandidat sa grupom za predsjednika, odnosno člana Savjeta mjesne zajednice (neću za predsjednika), a vi mi nemojte dozvoliti da budem kandidat, pa ćemo vidjeti tamo na Sudu gdje sjede ozbiljniji ljudi, gdje sjedi neko ko nije podložan baš toliko politici pa će nam on presuditi ko je upravu, a ko nije. Očigledno je da ovo što ja govorim vi ne prihvatate ozbiljno. Spreman sam i ići ću sigurno do kraja. Kandidovat ću se, a vi mi nemojte dozvoliti kandidaturu, pa ćete to na Sudu objasniti kako ste vi imali Odluku Vijeća, za koju ja nisam glasao i većina ne bi trebala glasati, kako ste donijeli ispravnu Odluku da ja ne mogu biti kandidat. Znači, vidimo se na izborima u slučaju da se ne promjeni ova Odluka, a ja sam vam rekao šta je razlog što su članovi Savjeta nezainteresovani za rad i što ne dolaze.

BESIM GLJIVA – samostalni vijećnik

Ja u ovom Vijeću nisam ni pozicija ni opozicija. Ja tako funkcionišem. Taman kad pomislim da je ovdje zavladała jedna harmonija, par sjednica se glasa sa 20 i više glasova, ispade nešto što pokvari sav taj ambijent u ovom Vijeću. Šta opet? Činjenica je, mi smo ovdje predstavnici politike, pa moramo politički pričati. Puno bi nas narod i mi sebe sami razumjeli kada bi pričali otvoreno i iskreno. Jasno je nama svima. Politika koja vlada želi da donosi političke Odluke, pokušava na sve načina da ih progura i o tome ne treba pričati. I ovo je klasična politička Odluka. Ja razumijem da politika koja vlada hoće da ima svoje predstavnike i na terenu. Međutim, malo me razočara kada ne dobijem pravi odgovor, iskren i realan od ljudi u koje imam povjerenje, bez obzira na njihovo političko opredjeljenje. Niko mi nije odgovorio na pitanje čime se predlagač rukovodio kada je rekao da ne može općinski vijećnik i ne može uposlenik Službe za društvene djelatnosti i poslove mjesnih zajednica biti kandidat za Savjet MZ-e, a svi ostali mogu. To je toliko "providna" Odluka, a ja znam i motive, ali to je sada nebitno. Međutim, vi ste toliko "providni", vi obezvrjeđujete pamet ove desne strane. Rekao sam da ne želim da budm ni pozicija ni opozicija u ovom Vijeću. Sjedim ovdje 16-17 godina od mjesta predsjedavajućeg, od prve do zadnje klupe, u svim sam procesima učestvovao, a od ovog Vijeća sam očekivao najveću pamet, jer ovdje je najviše obrazovanih ljudi koji šute već dvije godine. Hajde recite nešto pametno. Ja to od vas očekujem. Nemojte govoriti tuđim mozgom i tuđim jezikom. Ako je uredu diskriminacija prema bilo kome, ne mora on biti ovdje u Vijeću, neka ide i to. "Svako brdo ima svoje strmo".

ALAN ŠERAK – vijećnik SDP-a

Zašto u proces izrade ove Odluke nije uključena Komisija poslove mjesnih zajednica i saradnju sa drugim općinama i gradovima? Predsjednik ove Komisije je ovdje prisutan i možda bi bilo dobro da i on nešto kaže.

AKIF FAZLIĆ – općinski načelnik

Pitanje vezano za glasanje u odsustvu – mi nemamo ni kapaciteta ni mahanizama da možemo angažirati ljude u odsustvu da glasaju. Znači, svi oni koji su pristuni, biće na Biračkom spisku i moći će glasati. O tome da više ne pričamo, jer to je toliko objektivan stav i razlog.

Ovo što je vijećnik Špodić pričao – ja, kada bi mjerio sve prema Savjetu MZ-e Podlugovi, možda bi nešto i drugačije koncipirao. Međutim, to je MZ-e Podlugovi i još jedna ili dvije mjesne zajednice i tačka. Dakle, ja gledam četrnaest mjesnih zajednica i gledam kako da to uradim, unaprijedimo i da to bude puno bolje nego što jeste do sada, a svi smo konstatali kako je bilo do sada. Sve što je gospodin Špodić govorio vezano za njegov način izbora u Savjet, Vijeće, ovo, ono, baš zbog toga mi ne želimo spojivost vijećnika i člana Savjeta MZ-e. Dakle, koristi se jedna pozicija ili druga za jednu ili drugu. To je nepošteno. Stalano ja ponavljam, izabrani zvaničnici na dva nivoa i onda on koristi jedan nivo za koji je izabran za drugi, pa onda obratno. Dakle, to je suština.

Treće, ja, kao predlagač, predlažem amandaman na ovu Odluku, ovo što je Komisija rekla u članu 10. Nespojiva je funkcija predsjednika i člana Savjeta mjesne zajednice sa uposlenicima Službe za društvene djelatnosti i poslove mjesnih zajednica da piše: "Nespojiva je funkcija predsjednika i člana Savjeza mjesne zajednice sa uposlenicima Jedinstvenog Općinskog organa uprave Općine Ilijaš".

Što se tiče pitanja za Komisiju za poslove mjesnih zajednica i saradnju sa drugim

općinama i gradovima, to nemojte mene pitati. Vi ste izabrali Komisije, vi usvajate Izvještaje o radu Komisija.

Diskutanata po ovoj tački dnevnog reda više nije bilo, pa je OV-e, uz amandman:

"Nespojiva je funkcija predsjednika i člana Savjeza mjesne zajednice sa uposlenicima Jedinog organa uprave Općine Ilijaš", većinom glasova donijelo

Odluku o uslovima, načinu kandidiranja, održavanju izbora, dodjeli mandata u mjesnim zajednicama i razrješenju predsjednika i članova Savjeta mjesnih zajednica

ALMIR ŠPIODIĆ – vijćenik BPS-Sefer Halilović

Izrazio je sumnju na glasanje i zatražio pojedinačno glasanje.

ZA su glasali sljedeći vijećnici: Šeherzada Ćosić, Anel Bumbulović, Vehid Halilović, Alma Omerović, Mehmed Sinanović, Adem Alić, Fahir Hasanović, Mirza Bektić, Semir Dedić, Halid Dizdarević, Rasim Šehić, Melisa Matoruga, Alen Hasković i Sead Šehić

PROTIV su glasali sljedeći vijećnici: Alan Šerak, Mirsad Osmanović, Muhamed Handžić i Almir Špodić

UZDRŽAN je bio sljedeći vijećnik: Besim Gljiva

Odsutni vijećnici: Eldar Šehić, Edhem Hasanović, Asim Mujić, Semir Dizdarević, Meho Džindo i Akif Bešlija

Konstatovano je da je sa 14 glasova ZA, 4 PROTIV i 1 UZDRŽANIM, Općinsko vijeće donijelo

Odluku o uslovima, načinu kandidiranja, održavanju izbora, dodjeli mandata u mjesnim zajednicama i razrješenju predsjednika i članova Savjeta mjesnih zajednica

AD-9

Nacrt Odluke o definisanju prijedloga školskih područja za javne ustanove, osnovne škole na području općine Ilijaš

Diskutanata po ovoj tački dnevnog reda nije bilo, pa je OV-e jednoglasno donijelo

ZAKLJUČAK

Član 1.

Utvrđuje se Nacrt Odluke o definisanju prijedloga školskih područja za svaku javnu ustanovu, osnovnu školu na području općine Ilijaš i stavlja na javnu raspravu.

Član 2.

Nacrt Odluke o definisanju prijedloga školskih područja za svaku javnu ustanovu, osnovnu školu na području općine Ilijaš stavlja se na javnu raspravu, kako slijedi:

- objavom putem web stranice općine Ilijaš
- objavom na oglasnoj ploči općine Ilijaš
- dostavljanjem na e-mail adrese osnovnih škola, mjesnih zajednica i političkih subjekata

– javnim uvidom u maloj sali Općine Ilijaš (zgrada općine-drugi sprat)
U javnoj raspravi učestvovat će: Nastavnička vijeća i Vijeća roditelja osnovnih škola, Savjeti mjesnih zajednica i političke stranke.

Član 3.

Javna rasprava o Nacrtu Odluke o definisanju prijedloga školskih područja za svaku javnu ustanovu, osnovnu školu na području općine Ilijaš se određuje u trajanju od 30 dana, počev od 20.04.2019. godine do 20.05.2019. godine.

Član 4.

Nakon provedene javne rasprave zainteresovani subjekti mogu dostaviti primjedbe i prijedloge Službi za društvene djelatnosti i poslove mjesnih zajednica u pisanoj formi ili putem e-maila: drustvenedjelatnosti@ilijas.ba, najkasnije do 20.05.2019. godine do 15:00 sati.

Primjedbe i prijedlozi dostavljeni poslije navedenog roka neće biti uzeti u razmatranje.

Član 5.

Ovaj Zaključak stupa na snagu danom donošenja.

AD-10

Prijedlog Odluke o naknadama za korištenje podataka Adresnog registra

Diskutanta po ovoj tački dnevnog reda nije bilo, pa je OV-e jednoglasno donijelo

Odluku o naknadama za korištenje podataka Adresnog registra

AD-11

Prijedlog Rješenja iz imovinsko-pravne oblasti:

a) broj:06/1-31-373/19

b) broj:06/1-31-535/19

Diskutanata po ovoj tački dnevnog reda nije bilo, pa je OV-e jednoglasno donijelo

Rješenja iz imovinsko-pravne oblasti:

a) broj:06/1-31-373/19

b) broj:06/1-31-535/19

Nakon što je iscrpljen dnevni red, predsjedavajuća Alma Omerović zaključila je tridesetu sjednicu OV-a Ilijaš u 16:30h.

Zapisničar:
Maida Habibović

PREDSJEDAVAJUĆA
OPĆINSKOG VIJEĆA ILIJAŠ

Alma Omerović, BA nov.

Ul. 126. ilijaške brigade br. 6, 71380 Ilijaš
Tel. ++387 33 580-620, 580-698, fax. 400-505,
Transakcijski račun kod VAKUFSKE BANKE,d.d. Sarajevo:1602000000710645
e-mail ov@ilijas.ba
certifikat:CRO20063Q

